

ASO GAFUA, 14 APERILA 2014

Na tauaofia le Fono Aoao Faitulafono i le itula e 9:00 i le taeao e tusa ai ma le Tolopoina mai le aso 27 Mati, 2014.

Na nofoia le Nofoa e le Fofoga Fetalai i le itula e 9:00 i le taeao.

Tatalo.

FOFOGA FETALAI: I le agaga faaaloalo ou te muamua ona ou faapoipoi vagana i leni taeao fou, le taeao manino ma le taeao totoa. E talitonu o lea ua tatou momoli lapalapa o Malo ma ua tatou momoli laau i Fogaa e ala i le tatou faasani ma le faapolo i le Atua, ona ua mafai ona tatou aulia ma le manuia leni taeao fou. I le agaga faaaloalo ou te ofo alofa atu ma ou faatalofa atu i le tulaga aloaia i le paia ma le mamalu mauualuga o le Maota i ona tulaga faalupelupe, o Sa ma Faiga i le paia o Aiga, o Aiga ma a latou Tama, o Tama ma o latou Aiga, le Usoga a Pule ma Tumua, Itua ma Alataua, Aiga i le Tai ma le Vaa o Fonoti. O paia na o Samoa o lo o outou su'i le tini ma salasala na lafo i ai tofiga a le atunuu aua le mamalu ma le paia mauualuga o le Palemene leni i le afio o lau Afioga i le Palemia ma lau Kapeneta mamalu, afifio foi lea tala na atoa i lau Afioga i le Taitai o le Itu Agai ma sui usufono mamalu uma o le Maota Fono i leni taeao.

E le faaitiitia le agaga faafetai i le Atua ona ua tatou taunuu i ataata o Taulelei, ua muā, muā ai le asō e pei o le upu ia Tualemoso. Ua sau le vaa na tiu, tau mai i le vaa na tau, a o lo o lalago pea la o le vaa na faō afolau. O leni taeao e ofo alofa ma faatalofa atu ona sa tatou taumavae i nai vaiaso ua tuanai atu, a o le asō, o le aso na atofa, o le aso na lupe, o le aso na faalagilagi o le a tatou toe faatasitasi ai i lo tatou Maota Fono aua le faaauuina o a tatou galuega.

E faafetai atu ona o lea ua vaai atu ua atoa tino o le tama na moe i le ana i le paia ma le mamalu o lo tatou Maota. Sa tatou feagai ai ma nisi o faafitauli ona o le faamai fofoga sa i ai lo tatou atunuu, a o lea ua matau atu i leni taeao ua alafai mai i faguga lelei le paia mauualuga o lo tatou Maota.

E faafetai foi ona o lea ua tatou toe faatasi ma le Afioga i le Taitai o le Malo sa alo atu i nisi o faiga malologa ma sailiga malosi. Sa momoli talosaga lo tatou Maota Fono ina ia taulu, taulu tatou toe feiloai i se taeao manino ma se taeao totoa faapenei. Ia viia le Atua i Lona alofa ma Lona agalelei.

E le mafai foi ona faagaloina le tapuaiga a Samoa i ona paia ma mamalu sauoo. Samoa, i lou ava ma le faaaloalo tele e faafeiloai atu ai i leni taeao fou. Le tapuaiga mau i le paia i Aiga ma a latou Tama, o Tama ma Aiga vaeane le paia o Samoa i ona mamalu, o ona paia sauoo ma ona pa e le solo; faafetai le tapuai. O le manatu ma le lagona ua oo mai le faamafanafanaga o a outou tapuaiga, a o le a alo atu le Palemene i le faatinoga o ana galuega i leni aso.

E i ai le talitonuga, o le a alo le Palemene e ala i galuega faaauauina. E le natia o le vaiaso ma le aso fonu na tatou taumavae ai, na matauina ai le tele o a tatou galuega tuua, ae peitai, ua tele a tatou galuega na faaauau, ae e tatalo atu pea ma le agaga faaaloalo i le paia o le Maota ona o lo o i ai pea nai galuega tuua e tatau ona faataunuina. O le ala lena o le toe tolopo mai o le tatou Fonu i le amataga o lenei masina, o lea ua tatou toe taunuu mai ai i le alofa ma le agalelei o lo tatou Tapaau Sili i le lagi ma e manatu o le a toe faaauauina a tatou galuega.

Alo maia le paia maualuga o le Maota ona e talitonu o le a taumafai e faatulaga polokalame o lenei aso, ona faapena lea ona tatou logologopuialii i taualumaga e faafoe ai le tatou Fonu i le aoauli ma le po a nanei.

Susuga Hon Tuilaepa Fatialofa Lupesoliai Aiono Neioti Sailele Malielegaoi (Palemia): Lau Afioga i le Fofoga Fetalai.....

FOFOGA FETALAI: Tulai mai lau Afioga i le Taitai o le Malo, lau Afioga i le Palemia.

SAUNOAGA FAAFETAI A LE PALEMIA

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai faapea sui usufono mamalu o le Maota, ou te manatu e tatau ona ou tulai atu e faatalofa atu i le maleifua mai ma le alafai mai i lenei taeao fou o lo outou mamalu i le alofa matalasi o lo tatou Matai. Malo afua, malo ua maua i lo outou soifua maua pea, ma e ao ai ona faafoi le viiga ma le faafetai i le Atua faapei ona tau molimoli ai e lau Afioga i le Fofoga Fetalai le tatou faapolo ma le faasani, ua avea ai pea lau Afioga i le Fofoga Fetalai ma a tatou Ositaulaga Sili i aso uma e fonoa ai le Malae i Tiafau nei, o le Malae o le Faautugatagi a Samoa. O lea lava ua e tau faataitai, tau faataitai ma a’o mai au lauga ia matou, o lea ua matua siamu atoa le tulaga lea i lau matafaioi, ua faamalo.

Ua ou tulai atu ma le ava tele ona o la tatou Fonu faaauau lenei e tagofia ai mataupu tuua mai le tatou tauaofiaga i le masina talu ai. E le toe na ma le laina lo’u mou faafuasei atu a o faagasolo a tatou tauaofiaga o le fonousu a le atunuu. E pei foi lele ua ou tuua faapo-evaga le tatou mafutaga mafana. O lenei ua tatou toe fonu i le aso, ua tatou fonu ane ae ua faamanatu mai e le tasi o au Minisita, “Na tatou o i le tatou fonu talu ai o 68 ou tausaga a o lenei ua 69 ou tausaga i le taeao nei;” ia po o le 96 foi ou tausaga pe a fefulisa’i le 9 ma le 6 aua o le mea lava e tasi. O tausaga ia, e ese le mataga pe a e ausia, o le mataga ia o fuainumera ia o le 6 ma le 9.

E matautia le mou televave atu o le taimi, a o se laolao lelei lenei ou te tulai atu ai ma le agaga faaaloalo e molimoli atu ai si au faafetai le a’ua’u i le aufai tatalo i le latou galuega o le faanonomanū, aemaise i latou uma lava o lo tatou Maota nei, e faapea foi Taitai o Ekalesia ma le maave eseese o le atunuu na asiasi atu a o ou i ai i Motootua, ae faapea foi le Maota Gasegase i Mercy Ascot i Aukilani, a o tau tatope ou tui puipua e faamalolosi ai lau autau o i totonu o ou alatoto, se i tulou.

Ua ou taua lea upu ona o lea sa outou faafogafoga i le tatou fonotaga talu ai, na manino i le saunoaga matagofie a le Afioga i le Minisita mo le Soifua

Maloloina le matua tataua ia i tatou uma ona faamalolosi a tatou autau i totonu o o tatou tino, e ui toetiiti lava faatopetope atu ai ma au, ae aoga mea e tutupu e maua ai mafaufauga fou.

E faapitoa lau faafetai i lau Afioga i le Taitai o le Itu Agai ina ua e oo atu ta feiloai i Motootua. E leai ma sou manatu o le a e oo atu, ae na faatino lava lou tofi o le Tiakono Toeaina Faatonu. Afai e te le i Toeaina toe Faatonu, o lou matupalapala tō lena. O ai o toe ai sili, o mamalu e tuuina atu i totonu o le Maota tatou te tiu ai na o i inei, a uma lava i inei ona uma ai lava lea, ina ne i te i foi ua o atu nisi a o nai a tatou lava palupaluga masani, ina ne i moliū i le Au Toeaiina. Ae ina ua ou logotala mulimuli ane e pei ua e faasalalau i le agaga faavavau moni faaagai lau Afioga i le Taitai o le Itu Agai e faapea ua ou matua ma'i lava ua toe o ni nai aso, ua ou tau masalomia ai foi ma le agaga na e oo atu ai. Ailoga e i ai se isi o tatou e le fia alu atu i le ola e faavavau? Ona pau lava le eseese o le taimi. O le tatalo i lo tatou Matai, se i toe tolo teisi atu i tua tatou, se i tau uma isi faiga palota o i luma.

Lau Afioga i le Fofoga Fetalai ma le mamalu o sui usufono, faamalo le usufono, faamalo le onosai ma le faapalepale. O lea ua atagia ua tele ina tuutiitia a tatou galuega ona o Tulafono ma Lipoti sa oo lava i ai le fefaaaliaiga o la outou tofa. O le vaiaso foi lenei, o le vaiaso o le faamanatuina o puapuaga o lo tatou Alii. O le faamoemoe lau Afioga i le Fofoga Fetalai, ia tatou fono seia oo atu i le Aso Lulu ona tatou malolo ai lea. E taumafai Lipoti e mafai ona ausia, ae faaiu i le Lipoti ua leva ona faatali i ai le Maota, o le Lipoti a le Faalapotopotoga o Fanua po o le SLC.

O upu taua foi e faamanatu ia i tatou uma a le isi tamauli na fai mai a ia, “faifai lemu si a tatou mesu fai mai ai Iesu.” O au o le Minisita fou o i ai nei a le SLC, lau Afioga i le Taitai o le Itu Agai, talu ona ou foi mai na ona ou logo atu i lau Afioga i le Taitai o le Itu Agai, ua matua toe ola faasoloatoa e pei se ola a se iliafi musele o la'u autau.

Ia manuia tele le fonotaga i lenei taeao, soifua.

FOFOGA FETALAI: Malo, faafetai saunua i lau Afioga i le Taitai o le Malo. E manatu foi ua logona le paia ma le mamalu o le Maota e ala i le faafeiloaiga a lau Afioga i le Palemia. O le mea sili faafetai i le Atua ona ua tatou toe maua lenei laolao lelei tatou te toe fesilafai ai aua le faaauuina o a tatou galuega.

O lea e te tau tulai mai. E i ai sau tala e fia fai? O i ai se ava po o le a se mea lea e te tau saunua mai ai?

Afioga Hon Palusalue Faapo II (Taitai o le Itu Agai): Lau Afioga i le Fofoga Fetalai.....

FOFOGA FETALAI: Ia, sei tulai mai le Taitai o le Itu Agai.

Afioga Hon PALUSALUE FAAPO II: Ua leva lava ona ou fia tulai atu ma le agaga faaaloalo ona o lea ua saunua ma malele le Afioga i le Palemia, ua ave foi le tatou faapolo ma le faasagi i lenei taeao ona o lea ua tatou feiloai fiafia ma le Afioga i le Palemia e tusa ai ma le sailiiliga malos, e le gata i le Maota Gasegase i Motootua nei a o Niu Sila.

E pei ona ou oo atu foi ma feiloai ona o le agaga maualuga lea, leaga e tapuaia e le gata o lena Itu a o lenei foi Itu aua o le Palemia a tatou uma lava,

aemaise o lo o tapuai Samoa. E pei foi ona tatou felafaoi ai mai lea taimi i lea taimi, o lou lava naunautaga ia aua ne i faaufiufia faamanu gase le gasegase o le Afioga i le Palemia, ae ia tatou tapuaia.

O le mea lea lau Afioga i le Palemia, ua faamalo faafetai, aua o lau saunoaga masani lava, o lou fatu e malepe ai le masini pe a ave e siaki, a o lea taimi e le o lou fatu a o lou aao ua faaletonu. O le mea lea e momoli atu ai le agaga faafetai ona ua toe taliu manuia mai lau faiga malaga. E le gata foi i lea masalo o le Vaega atoa lenei na tapuai i lau siiga-gasegase. Na fai a matou mafutaga tatalo ona o lou gasegase. A o lou popolega ma le popolega o lenei Itu o lau Vaega ma lau Itu pe sa tapuai ma le faamaoni. Ioe, pau lava lena o le mea lea e faafesili ai pe sa tapuai ma le faamaoni? A o le mea e sili ona taua ua e afio mai, o lea ua silasila atu ma vaavaai atu foi le Palemene ua e toe malosi aua ou tiute ma ou faiva.

E avea foi lenei avanoa e avatu ai le faamalo a lenei Itu ona o le faaaloalo maualuga ua tuuina atu e le tatou Iunivesite o faailoga maualuluga e amanaia ai lau tautua i totonu o le atunuu. Faamalo, faafetai mo ia faaaloaloga maualuluga, e avatu ai ma moomooga alofa o lenei Itu, ia saga faamanuia le Atua i lau Afioga. E le tele foi se tala pau lava o lea, ia se taimi oo atu se matou ava e tusa ai ma lau faigamalaga.

A o lenei aso ma le galuega lau Afioga i le Fofoga Fetalai, ia alofa mai le Atua, o lou lava talitonuga, tatope a tatou Lipoti ia ae sei tatou oo i le Lipoti a le Okika ma le Komiti Faa-Palemene, pei ona saunoa le Afioga i le Palemia, o lea ua toe taliu mai lana Afioga o lo o feagai ma le Faalapotopotoga a le SLC.

Ia manuia tele lau Afioga i lenei taeao, aemaise foi o le Palemene.

FOFOGA FETALAI: Ia malo talifuaitau i le saunoaga a lau Afioga i le Taitai o le Itu Agai. E manatu foi e tele taeao ae le lau taeao, ua tele upu i manu i lenei aso ma mea lelei ua tutupu. O lea ua saunoa manino le Taitai o le Malo na afio i lana siiga mai o 68 le soifua o lona tausaga, a o lea ua tatou feiloai i le aso, o le aso tonu lenei e faamanatu ai le aso fanau o le Afioga i le Palemia e 69 tausaga. Sa manatu la o le a toso se fala ava i le aso i lo tatou Maota i le taitaiga a lau Afioga i le Itu Agai aemaise o sui usufono mamalu o le tatou Palemene. E ui o lea, o le a i ai se taimi o i luma ona faatino lea o le faamoemoe lea.

O le aso foi e taoto lua ai le seuga e atoa foi i ai lou 48 tausaga, leaga o maua ma te aso fanau faatasi ma le Afioga i le Palemia o le aso 14 lenei o Aperila. O le aso foi lenei lau Afioga i le Taitai o le Itu Agai, na ou mana'o lava e tolopo le Fono i le aso lenei, e le gata ina ia faamanatu ai le soifua o le Afioga i le Palemia ma lou foi tamai aso fanau, ina ia aua ne i e toe fesiligia le tatalo a le Fofoga Fetalai, ioe, ma aua foi ne i e toe fesiligia le faasologa o Pepa o Galuega, tuu mai ia te au ou te faasolosoloa le tatou galuega ona manino lea ma malamalama le tatou mataupu.

E ui o lea, ia o lea ua fetai fola, faafetai i le saunoaga a lau Afioga i le Palemia, talifuaitau foi le fetalaiga i le Afioga i le Taitai o le Itu Agai, ia tatou ave lea i uta ae o le a faagasolo le tatou galuega.

TUUINA ATU O LIPOTI A KOMITI FILIFILIA

Na tolaulauina e le Failautusi le Lipoti a le Komiti Filifilia ua tuuina atu e tusa ai ma T.T.51(5).

1. P.P. 2013/2014 Nu. 138, Lipoti a le Komiti o le Soifua Maloloina, Galuega tau le Va Fealoai, Mataupu tau Lotoifale ma Atinae o Afioga ma Agafesootai i le Tulafono Tau Faaofi o Auaunaga Faa-Soifua Maloloina a le Atunuu 2013.

ILOILOGA O LIPOTI A KOMITI FILIFILIA

P.P. 2013/2014 NU. 108, LIPOTI A LE KOMITI O OLOA GAOSIA TULAGA MUAMUA, MATAUPU TAU PISINISI, ALAMANUIA MA LEIPA I LE P.P. 2012/2013 NU. 75, LIPOTI FAALETAUSAGA A LE MATAGALUEGA O FAATOAGA MA FAIGAFIIVA MO LE TAUSAGA FAALETUPE NA FAAIUINA ASO 30 IUNI 2011 – ILOILOGA

Afioga Hon LEAUPEPE TOLEAFOA APULU FAAFISI (Taitaifono Komiti o Oloa Gaosia Tulaga Muamua, Mataupu tau Pisinisi, Alamanuia ma Leipa): Malo faafetai. Ae ou te lei faatuina le lafo, e ao foi ona faapoopo se lagona i lenei taeao e auai faatasi le agaga o le sui usufono mo Aana Alofi Nu. 1 ma le finagalo o lau Afioga i le Fofoga Fetalai e tusa ai o le tatou faafetai ma le taulaga siitia i lenei taeao, ia ua faafofoga le Atua i lou finagalo pei ona toe amatalia ma toe tauaofia le tatou Fonotaga. Ia o lupe lava sa vaoeseese a o lenei ua fuifui faatasi, ia o le alofa ma le agalelei o le Atua i lo outou soifua ma lo tatou ola, ua tala i le lagi le mamalu ma Lona silisiliese, e faaalua i le soifua manuia o le Palemene Lona agalelei i lenei taeao.

E fia oo foi se faatalofa atu i lau Afioga i le Palemia ma le Taitai o le Malo, sa tatou le faatasi i siui o le tatou Fonotaga talu ai, ona o le sailiga malosi, e ui o lea, e faamalulu atu foi i lau Afioga i le Taitai o le Malo, o le tele o nisi o sui usufono mamalu o le Palemene aemaise foi o le aufaitatalo na mafai ona oo atu e asia lou apulu o tofaga ma le falaefu i lau Afioga, ia ae sa matou tatalo i le mea lilo, ina ia faapena ona taulutaulu, afuafu a matagi le finagalo o le Atua ae ia toe foi i fanua, ina ia toe faafosisia le laulelei i lau Afioga i le Taitai o le Malo aua tiute ma faiva pei ona maua i lenei taeao. Faafetai foi o lea ua atoa lou 69 tausaga e pei ona faasilasila mai e lau Afioga i le Fofoga Fetalai, aemaise foi o le 48 tausaga o lau Afioga i le Fofoga Fetalai. Ia e faia lava e le Atua mea silisili aua le soifua auauna e ala i tiute fai ma faiva pei ona feagai ai.

E faapea foi ona matou faafetai atu i le Taitai o le Itu Agai ma lea Itu o le Maota, ia sa tatou tau fai tui lava le mulipapaga ma tuu atu i le Atua, ina ia faapena ona tatou toe feiloai ma lo tatou Taitai ia le Afioga i le Palemia, aua faiva ma tiute e avea ai i tatou o taitai o le atunuu tatou te feagai ma upufai o Malo aua se manuia o Samoa ma lana tapuaiga.

Lau Afioga i le Fofoga Fetalai ou te tulai atu e faatu le lafo, *Ina ia faautagia e lenei Fono Aoa le Lipoti a le Komiti o lo o tuuina atu ai ana Sailiiliga, Fautuaga ma Iugafono.*

Ma lou faaaloalo.

Faaluaina e le sui usufono mo Siumu, ma le sui usufono mo Alataua Sisifo.

Afioga Hon LEAUPEPE TOLEAFOA APULU FAAFISI: Malo faafetai.

“FAUTUAGA:

I le maea ai o Sailiiliga a le Komiti, ua fautuaina ai le Malo e faapea:-

1. Faavae se Vaega o Maketi a le Matagaluega ma faafaigaluega ai ni tagata poto faapitoa i tulaga tau maketi ma fefaatauaiga, mo le faafoeina o mataupu uma e fesootei i ai, e fesoasoani ai i le Aufaifaatoaga ma le taumafaiga o latou Atinae.
2. Tuufaatasia i ana Lipoti Faaletausaga o le a tuuina mai i le lumanai ia vaegatupe atoa na maua mai i so o se atinae tau faatoaga, ina ia iloa tonu ai vaegatupe maua mai faatoaga, aua o vaegatupe uma ia na afua mai i taumafaiga a le Matagaluega.
3. Moomia le toe auina vave mai o se isi uta povi ma mamoe mo le faamalieina o manaoga o le Aufaifaatoaga, e faatali ai le toe fetuunaiga o lea polokalame a le Matagaluega, e pei ona fuafua ai le lē toe auina mai o se uta manupapalagi ae suia i se isi faiga fou.
4. Toe iloilo fuafuaga ua faataatia mo le tatalaina o le Tulafono e faataga ai Vaa Fagota Lapopoa mai fafo ona fagotaina o tatou ogasami, ona e ono tafitafia uma ai ma isi ia o lo o nofomau i o tatou ogasami.
5. Tuuina atu le lagolago a le Malo i Polokalame o Atinae tau faatoaga a le Matagaluega o lo o faagasolo.

IUGAFONO:

I le maea ai o Iloiloga a le Komiti, na faaiugafonoina ai e fautuaina le Fono Aoa,

Ina ia faamaonia le P.P. 2012/2013 Nu. 75, Lipoti Faaletausaga a le Matagaluega o Faatoaga ma Faigafaiva mo le Tausaga Faaletupe na faaiuina i le aso 30 Iunbi 2011.”

Ma lou faaaloalo.

FOFOGA FETALAI: Malo faafetai i lau Afioga i le Taitaifono. O le avanoa leni i se tasi o sui usufono e fia saunoa i le tatou Lipoti.

Tulai mai le sui usufono mo Faleata Sisifo.

Tofa LEALAILEPULE RIMONI AIAFI (Faleata Sisifo): Faafetai i lau Afioga i le Fofoga Fetalai mo le avanoa, e faatalofa foi i le paia o le Fonousu a Samoa, aemaise foi leni taeao ua faiva ese Lopepe, e le gata ua tatou oo mai aua foi le faaauauina o tatou galuega, a o lea ua maua le tala fiafia i le aso soifua o lau Afioga i le Fofoga Fetalai aemaise foi o le Taitai o le Malo, faamalo le soifua, faafetai i le Atua i le ola ma le malosi ua foaiina i a oulua Afioga aua le feagai i faiva ma tiute i le taitaiga o le Malo. Malo le soifua. O le tatalo a leni sui usufono, ia toe faaopopo nisi tausaga se tele e te lua soifua ma oulua auauna ai aua Samoa ma ona tagata. E faatalofa foi i le faafofogaaga i le tapuai mai a Samoa.

Ae momoli le faafetai i lau Afioga i le Taitaifono o le Komiti i le matagofie o le Lipoti e leai se vaega o leni Matagaluega tele e lei oo i ai le suesuega ma asiasiga a la outou Komiti. Ua faitau ma le totoa foi e tusa ai ma outou fautuaga ua tuuina mai. O le ala lea o le fia fai o se manatu i nisi o vaega.

Faafetai foi i lau Afioga i le Minisita ma le Matagaluega i le tele o galuega o lo o faatinoina pea i suiga lelei ma atinae lelei ua tulai mai i le tatou Matagaluega.

Ae faapitoa sau faamatalaga ona o lea sa omai o outou ata lalelei i le nusipepa i le faaiuga o le vaiaso ma le Sui Palemia ma le Minisita Lagolago i le Fonotaga taua lea sa outou auai i Fiti tau faigafaiva. Ona o lea e faamamafa mai foi i le Lipoti a le Komiti, atoa ai ma ni atugaluga. Atonu la o le Fonotaga lea sa outou i ai o le a maua ai se faamalamalamaga i nisi o vaega nei. Manatua foi lau Afioga, sa taua i se tasi o tatou Fono ma ou talanoa ai, i nisi o figota ia o le sami lea e naunau le tele o tatou e ave i fafo, figota foi ia e le fiafia i ai tatou e faaoga ae fiafia ai le tele o isi atunuu, ma o nei foi faiga o lo o faafailele ma lelei lona faatinoina i nisi o atunuu o le Pasefika ma nisi o atunuu tetele. A o le fesili la i lau Afioga, pe aisea ua le faataitai ai ia tatou? A o lea e manino le fautuaga ma le finagalo o le Matagaluega, e faasa, e faasa ona oo mai ni kamupani tetele nei i totonu e faia leni faafaileleina o nei figota, pei o maisu ma aliao ma isi vaega ia e fia lau i fafo e tagata, a o mea nei o lea e tele ia tatou. Pe e le mafai la ona fai le tulaga faa-faatoaga foi lea faafailele fai lelei, pei o mea ia e faatino i atunuu nei, aua ou te talitonu o le tasi lea tupe maua a tatou toe lelei, pe a faatino lelei.

FOFOGA FETALAI: Malie le sui usufono mamalu, sei avatu le avanoa i le faauilavea a le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, sa ou sailia ia Matagaluega e i ai taimi sa ou sui Minisita i Minisita o aafia. O le tulaga lea e i ai, o lo o taofiofi le itu lea o le o e fagotaina mai ia mea ia o loli ma mea faapena o fugafuga mai o tatou ogasami, ae o lo o faataga lava mea o gaoioiga e faafailele ai e latou. O le upu la na aumai ia te au o la e tapena e latou, e i ai nai vaega o lo o faatalanoaina ma latou e ana ia atinae ia, e le o taofia la, ae i ai nai vaega o lo o tapenapena ina ia mafai ai ona faatino ia atinae ia. O lona uiga o lea ua tali ia manao o i latou ia.

Mo le silafia, o lea e afio mai le Fofoga Fetalai, e le tele ni mea faapena i totonu o le tatou aloalo, ma o le tele o nai maisu ma loli ma mea faapena, toetiiti lava kilia uma mea i le taimi lea na faataga ai foi atinae faapenei i tagata toaitiiti na i ai. Ma o le mea ua maitauina, ua aafia ai ma le siosiomaga. E tusa o i latou nei e igoa o taavale lapisi e aoina le lapisi, e faamamaina lo tatou gataifale. E tele lava la le aafiaga o le tatou siosiomaga, o le ala foi lena o lea e uunaia ai atinae e fai i uta, ma o le mea lena o lea e agai i ai le Malo. E i ai se vaitaimi alu ai na maua mai ai i le itumalo o le Fofoga Fetalai ni sea slugs, o mea o neti tetele lava ma fugafuga. Na ou fuaina, e faapea le uumi, ae faapea le lapopoa (*sa faaaoga aao o le Palemia e faatusatusa ai neti ma fugafuga*), ae aumai i tai i le moana. O ituaiga figota la na o lea e agai i ai latou ia, aua o le maua o figota na, e tele le seleni e maua ai. Sa maua foi i le matou itumalo mea o sauai, tasi lena figota e tai pei o neti e maua ai le sea, e tai faapenei le uumi, ae faapea le lapopoa ae mumu. Na ou alu i Vanuatu i le 1984, ona ou iloa ai lea o la e tele i Vanuatu a ua leai tatou, ona i le taimi na ou vaai i ai ma ou ai ai i le 1950 i le matou nuu, o le matua malulu. Ou te lagona o le mea foi lena na vave ai ona extinguish ituaiga figota nei ona e fiafia i ai o tatou tagata, a o le igoa lena o le sauai. E fai mai le tala, o la e maua i le loloto i gatai i Aleipata. Sa ou fautuaina foi le Minisita o Faatoaga talu ai ia Taua Tavaga Seuala, e taumafai e talanoa i atunuu nei i fafo e aumai mea nei e faafailele i totonu o le tatou atunuu. O lona uiga la, e le o faasaina, ae i ai feuiuaiga ma feutanaiga e lei maea ae o mea nei e fai i uta i le eleele matutu, ina ia le aafia ai a tatou lava fugafuga, o loli ma mea faapena e faaaoga e tagata o le tatou atunuu.

Lau Afioga i le Fofoga Fetalai, o le faamalamalamaga lena.

FOFOGA FETALAI: Malo faafetai fesoasoani mai i lau Afioga i le Palemia. Tulai mai le sui usufono mamalu e faaauau le saunoaga.

Tofa LEALAILEPULE RIMONI AIAFI: Faafetai mo le faamalamalamaga. Ia manatua foi lau Afioga o le itumalo lena o Faleata e amata atu lava i Faleata Sasae e oo i Puipaa, o aso uma lava o lena olaga e fagota i le gataifale, so o se mea, sami, ia, figota. A o le mea la e popole ai nei nisi o matou faifaiva, ua tau le sao paopao i tai na o le o atu ma tutai mai i mea ia o maisu e tai faapea le lapopoa (*sa faaaoga ona aao e faatusa ai le tele o maisu*), ua tele le mea i tai, ae le ave la e faafailele foi lele, e aoga. E sao le finagalo o le Palemia i le mea foi lele o le soona fai. Ae pei o le mea lea e avatu ai se manatu, aua o la e fai e isi atunuu, o lena e silafia e lau Afioga i le Minisita, ae afai la ua i ai se fesootaiga, ona omai lea e faafailele mea nei ae maua ai tupe a nai itumalo nei e tele ai.

O le isi la vaega lea e fia oo i ai se faamatalaga, o lea e manino i le Lipoti le atugaluga o le Komiti i le Tulafono lea ua tatala ai le faataga mai o vaa tetele nei e fagogota i tua atu o tatou ogasami nei i tua atu o le 25 maila. O le finagalo o le Matagaluega, e leai se aoga e faasa ai, a o ia e feoai solo, e migrate foi lele e le nonofo i se mea e tasi. Ou te le o mautinoa aua o upu ia o lea e aumai i le Lipoti. Afai la ua leai se aoga e faasa ai, ae o le a le aoga e faataga mai ai, po o le a se manuia o Samoa e maua mai ai i nei vaatetele? Aua o lea ua amata ona tapunipuni tatou kamupani ia tetele ia sa tatou tua i ai, pe le o le mafuaaga lea. Ae fia la, o lea e fia iloa e lou sui usufono, pe fia

ni tupe o laisene ai, ae o le a se manuia alualu pea o Samoa e maua mai ai i le tatala pea o nei vaatetele, aemaise vaa nei o Asia. A tatou o i Asia.....

FOFOGA FETALAI: Malie le sui usufono mamalu sei tuu atu le avanoa i le faamalamalamaga a le Afioga i le Minisita mo Faatoaga ma Faigafaiva. Tulai mai le Minisita e saunoa.

Afioga Hon Le Mamea Ropati (Minisita mo Faatoaga ma Faigafaiva): Faamalo faafetai. E faatalofa atu ai i lau Afioga ma le paia o le Maota i lenei taeao. O lo o talanoaina foi le Lipoti a lenei Matagaluega, o lea ua saunoa atu le Afioga i le Palemia i nisi o mea e toe faaopoopo atu i ai i se isi taimi. Ae o lea ua oo i vaafagota nei mai fafo, o le taimi nei, e leai se vaafagota mai fafo o lo o laiseneina i totonu o le tatou atunuu. O le tulaga sao lava lena, e leai ma se vaafagota i fafo o faatagaina i le taimi nei. Ae o lo o tilotilo i ai le Matagaluega, o lea e i ai le Tulafono fou lea e tau fuafua e aumai, sei vaavaai foi i ai le Matagaluega i le mea e ono lelei mo le atunuu e maua ai nisi tupe ma maua atili ai ni ia aua le auina atu i fafo. A o le taimi nei lava latou, e leai ma se vaa o ave i ai se laisene.

O le tali atu lena ma le faaaloalo.

FOFOGA FETALAI: Malo faafetai i lau Afioga i le Minisita. Tulai mai le sui usufono mamalu e faaauau le saunoaga.

Tofa LEALAILEPULE RIMONI AIAFI: O le fuafuaga a le Matagaluega, o lea la ua saunoa lau Afioga, o le a tuuina atu ni laisene mo ni kamupani vaa mai Taiwan. O le ala lea o lou fesili, aua o lea ua aumai atugaluga o le Komiti, aua e ala ona tatala le avanoa, ua faamanuiaina i tatou i ni faamanuiaga e oo mai ai. Aua afai foi e i ai ni vaatetele o tatou e oo atu i tua i le 200 maila lea ma ona tua atu, atonu o lo o i ai se avanoa pe afai e maua mai ai se faamanuiaga tau tupe. Afai foi la o le tulaga lea, o le a le ituaiga – pe mafai ona hire mai e le tatou atunuu, po o le a se faiga pe fai faalisi mai vaafagota ma aumai uma le tupe ia tatou ae ave na o se vaega o se fee faapea aua ou te le o iloa lau Afioga, ou te faamalulu atu aua o le mea lea o lea e aumai i le Lipoti.

FOFOGA FETALAI: Sei tuu atu le avanoa i le Afioga i le Minisita mo Faatoaga ma Faigafaiva. Tulai mai.

Afioga Hon Le Mamea Ropati: Lau Afioga ma le faaaloalo lava, ia malie foi le sui usufono i lea tulaga, a o lena ua uma ona ou fai atu. O le taimi nei, e le o i ai se vaafagota, ae o lo o silasila totoa le Matagaluega i le mafai po o le le mafai ona i ai se fuafuaga faapena ona o lea foi ua vaavaai i le tele o isi atunuu i fafo e le gafatia e latou le fagotaina o ia, a o lo o i ai latou fale e gaosia ai ia tuuapa ma isi fuafuaga ma auina atu i fafo, o lo o tele foi le faamanuiaga o latou o lo o maua ai. A o le taimi nei, o lo o faia pea suesuega, a maea nei suesuega a le Matagaluega ma tuuina mai le Tulafono lea i luma o le Malo, ona tatou vaavaai lea i ai. A o le taimi nei, e le i ai lou manatu, e le manaia foi le tatou talanoa i lea mea, ae le o faia. O si au faaopoopo atu lea ma le faaaloalo.

FOFOGA FETALAI: Ia, sei tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, o le isi itu taua e fia fesoasoani atu e toe faaopoopo i le mataupu leni, e lei maoti tatou tuaoi. O le a faapefea la ona tatou pisa i tatou sone e lei maoti tuaoi? O lea ua amatamata ona fua tatou tuaoi sami ma Amerika Samoa. E i ai si lave lena e i ai i Amerika Samoa, ona o si tamai motu lava lea e i le itu i matu ua lavelave ai le fuataga, a o le fuataga ia e tuu lava i le ogatotonu. A o le tamai motu la lea, o lea e ono oo le mataupu lena e faamasino ai tatou ma le Malo tele o Amerika i le Faamasinoga a le Lalolagi. A o lea foi e i ai le fuafuaga, masalo e le o toe mamao ona faatino lea o le tatou tuaoi i sauté ma Toga, tuaoi i sauté sisifo ma Fiti, tuaoi ma Uea. O lona uiga e fetau foi tatou ma Falani i le itu i sisifo, tuaoi ma Toelau i le itu i matu sisifo. O le Malo e talanoa ma tatou o Niu Sila, Kiripati i le itu i matu, ma Cook Island i le itu i sisifo, e faapena foi ma Niue. O lea la e omia tatou i le vaiagia. O tatou le atunuu e aupito sili lava ona lamoi le ogasami e fagogota ai, a o le ia, o le iaeva, e i lalo i Niue nei ae i luga i Iapani taeao. O lona uiga la, o se taimi lava e pasi mai ai ia tatou, pue loa e tatou ona maua lea e tatou sina seleni. O le taimi nei, o lo o aveia tatou, e fono mai le fono tele a atunuu lea e fagotaina le sami ia Tesema. O lona uiga e uma le fono tele lea a le Small Island Developing States ona sosoo ai lea ma le fono tele lea a Malo o le Pasefika lea o lo o fagotaina le sami. O tupe uma lava la sa masani ona \$21miliona le tupe e maua mai e atunuu uma ona faasoa lea, ae lilifa i atunuu o la e tele le ia o la e maua ai. O le atunuu la o la e tele le ia o la e maua ai, o atunuu ia e i le itu i sisifo, o i ina le ana o ia, faasolo atu ai i matu, agai i Iapani. A o tatou, o lea tatou te i ai tonu lava i le ogasami e tau leai ni ia, o le ala foi la lena e na o se vaa faavalevalea e alu lava afe mai iinei i o tatou ogasami. O lea la e i ai la le faiga lena o lo o fai nei i le va o Samoa ma atunuu ia, o lea ua siitia i le tausaga na tea nei le seleni mai le \$21miliona i le \$60miliona e ave i atunuu o le Forum e 15 e aofia ai Niu Sila ma Ausetalia. A maua la le seleni lena, ona vaevae lea. E 15% e vaevae uma ai lava atunuu e aofia ai ma Samoa, aofia ai ma le vaega uma le ia. A o le isi 85%, e ave uma lava i atunuu ia e aupito tele le ia o lo o maua ai. E le aofia ai la Samoa i ina ma isi atunuu e le o tele se ia o lo o maua ai.

O le tulaga la lena o lea e tilotilo i ai le Matagaluega pei ona saunoa le Afioga i le Minisita mo Faatoaga ma Faigafaiva i auala eseese ia e mafai ona tau faafeoloolo ai le seleni, ae faigata tele ona o lea e le i faataoto tuaoi, nei tei ua tatou mateletele atu, ae aveifo o le eleele o Amerika Samoa. O lona uiga e pule e Amerika le ogasami. O le tulaga la lena o lea e i ai nei, a o le mea e aupito sili ona faafiafia loto, o le suiga lea o le tau lea o lo o i ai nei, o le vevela o le tau, e vevela ai foi ma le sami, aua o lea ua pue mai ata i satelite ua sasama atoa le ogasami i le itu i sisifo o le Pasefika. Ma o le sasama lena, o lea e atagia ai le vaega tele ua amata ona mafanafana. O lona uiga la, o lea ua amata ona agai mai le ia i le tatou itulagi. A agai mai loa i le itulagi o tatou, ona lavea loa lea o tatou i le tulaga lena o le 85% o le faasoa ma le 15% e aofia ai ma le isi vaega toatele. A o le tulaga lea, lafo mai o lea o lo o galulue ai le Matagaluega i le itu lena, a o lea foi e fai fesoootaiga i le taimi leni i se fale ia e faatu i totonu o le tatou atunuu. E le iloa pe oo atu i le

faaiuga o lenei tausaga ua manuia na fuafuaga o lo o galue ai le Minisita mo Faatoaga ma le Matagaluega.

Lau Afioga i le Fofoga Fetalai, o le toe faaopoopo atu lena i le mataupu, ae lafo mai le mataupu o lea lava o lo o galulue ai le Minisita ma le Matagaluega o Faigafaiva.

FOFOGA FETALAI: Malo faafetai i le faamalamalama a lau Afioga i le Palemia.

Ia tulai maia le sui usufono mamalu e faaauau mai le saunoaga.

Tofa LEALAILEPULE RIMONI AIAFI: Faafetai. Ia manatua foi sa afio le Afioga i le Palemia sa afio foi le Afioga i le Minisita mo Faigafaiva i le tatou Fono lea na uma atu, lea sa tatou pasia ai le Tulafono Tau Faaofi o Sone Tau Folauga i le Sami lea na saunoa ai le Sui Palemia, o tuaoi o nei mea ua uma ona faataatitia. O lea la pei ua tau le mautinoa i le taimi nei ona o lea ua saunoa le Afioga i le Palemia.

FOFOGA FETALAI: Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e eseese mamao lava le mea lena ma le mea lea na ou fai atu ai, o le fuaina, e lei fuaina. O lona uiga la aua o le mea lena atonu e fono matou o Taitai o atunuu o le Forum lea e fuafua i le masina o Aokuso, ona faatoa iloa ai lea o le tulaga o i ai sone nei, a o le Tulafono ia o Sone, o le malosi lena faaetulafono e aloaia ai mea ia pe a oo ina faatino.

Lau Afioga i le Fofoga Fetalai, o le tulaga lena ina ia malamalama lelei ai le tatou mataupu.

FOFOGA FETALAI: Malo. E manatu ua malamalama lou finagalo i lea mataupu le sui usufono mo Faleata Sisifo. Faafetai.

Tofa LEALAILEPULE RIMONI AIAFI: Faafetai o le a see ese ma lea vaega. O le mea sili o lea ua aumai le finagalo o le Komiti, o lea foi ua tuu atu i le Malo ina ia faautagia i taimi foi o fetuunaiga o nei vaega taua.

Faafetai i le fautuaga lea ua tuuina mai i se isi uta o mamoe ma povi. O au le isi sui usufono sa faaali foi lou faanoanoa tele i mamoe i le leva ona aumai e le tele. Ae ua toe sui nei lou manatu i le tulaga lea ua i ai le mamoe, e lelei tele le mamoe lea e ia tatou. Na pau lava le atugaluga i le tau, a o le tulaga lava ia i le aano, ou te lagolagoina malosi le fautuaga a le Komiti i le Matagaluega ina ia vave ona toe tuuina mai ni vaega nei o mamoe ina ia faatupulaia lona faitauaofai ma faaaogaina i le tatou atunuu.

FOFOGA FETALAI: Malie le sui usufono mamalu sei tuu atu le avanoa i le Afioga i le Minisita mo Faatoaga ma Faigafaiva.

Afioga Hon Le Mamea Ropati: Malo faafetai i le sui usufono mo le laga o le mataupu lea. Ia silafia foi o tatou mamoe lea na aumai muamua o mamoe na aumai mai Fiti, le ituaiga mamoe lea e tau o le Fiji fantastic le mamoe papae foi lea e tau leai ni fulufulu aua e vevela tatou. O le lelei foi o mamoe

ia, o le fanafanau soo. E le gata i le fanafanau soo, ae tai lua, tai tolu mamoe i le taimi e fanau ai. O lea la ua silasila le Matagaluega i le mataupu lea, ma ua maea ona feiloai ai ma le Minisita o Faatoaga i le fono lea sa matou i ai i Mongolia aemaise foi le fono lea faatoa uma ona e saunoa i ai i Fiti, aua o Fiti, o le mea lea ua tulai mai, ua tau mumusu Fiti e ave i fafo a latou mamoe, aua o lea foi ua omai isi atunuu o le Pasefika aisi i ai, aua e aupito lelei atu le ituaiga mamoe ia. A o le mea e sili ai, o lea ua ioe mai le Minisita i le vaiaso lea na tea nei sa ma feiloai ai foi, o lea o le a taumafai mai e aumai sina 100 mamoe e toe faaopopo i le tatou lafu lea e i ai, ona nei tei ua inbreed. Ae le gata i lea, o lo o fai pea suesuega a le Matagaluega i le isi breed lea o le tobar e maua i le itu o Niu Sila aemaise foi Ausetalia, atonu o lo o fai pea feutanaiga ina ia maua mai pea nisi mamoe e faafeusuai ai a tatou mamoe ina ia lelei atili. Aua o le suesuega a le Matagaluega lea e i ai, atonu o le a sili atu le mamoe foi lea e filemu, ae le gata i lea, ae vave ona fanafanau mo le fofoga taumafa, aua o le taimi nei ua matua fia taumamafa mamoe lava le tatou atunuu, ae sili la ona taumafai loa ina ia faafete le lafu mamoe mo le tatou atunuu. E fia faamalamalama atu ai i lau Afioga lea tulaga, a i ai se isi mea e mafai foi ona toe fesoasoani atu. O le tulai atu lea ma le faaaloalo.

FOFOGA FETALAI: Ia, tulai mai le sui usufono mamalu e faaauau mai le saunoaga.

Tofa LEALAILEPULE RIMONI AIAFI: Malo faafetai i lau Afioga i le Minisita mo Faatoaga, malo galue ma le sogasoga i nei mea lelei. Aua na pau lava le faitioga lea e aumai e nisi o faifaatoaga, aua e i ai foi mamoe a nisi o le matou vaega lea e i ai, e pei e tele manu fafine na avatu ae tasi le poa. Ia, ou te le iloa la po ua augata si mamoe poa, ua tau le toe... a o le isi vaega, e avatu mamoe e lua mamoe poa ae leai se mamoe foi lea – tina, fafine. Pei o le mea la lena e ala ai ona tuai ona faatupulaia le aofaiga o mamoe. Ae a maua atu la mamoe ia e te saunoa i ai e fai toloai, e tasi le mamoe ae...

FOFOGA FETALAI: Malie le sui usufono mamalu, sei tuu atu le avanoa i le faamalamalamaga a le Afioga i le Minisita.

Afioga Hon Le Mamea Ropati: Faamalo faafetai. O le tulaga lava lea, e silafia lelei lava e le Matagaluega le mamoe poa ma le mamoe fafine. E leai se mea i lenei lalolagi e avatu ni mamoe poa se lua ae tele ai ni tatou mamoe fafine a lea aiga ma lea aiga. E le mafai la ona tufatufa atu mamoe faapena. E oo atu lava le tagata o lo o manao i le mamoe poa ona ave foi lea i ai, a fafine foi ona ave lea i ai ae le faapea o le a avatu e le Matagaluega ni mamoe poa se lua po o ni mamoe se lua. E fuafua lava i si au lafu mamoe la ua i ai, ae sei taumafai pea pe i ai se isi mamoe pe mafai ona fanau mai ai le mamoe poa latou e maua ai nisi mamoe. Ia, ae lafo maia lou fanoga o le a sei silasila i ai le tatou Matagaluega. A o le mea e popole i ai, o le inbreed o mamoe, e tatau ona i ai se isi suiga mai se isi breed foi lea ina ia vave ai ona faaleleia atili a tatou lafu mamoe.

Ia, o lau soso atu lea ma le faaaloalo.

Tofa LEALAILEPULE RIMONI AIAFI: O le a faauma atu lau Afioga, faafetai foi i le Afioga i le Minisita mo Faatoaga. A tatou talanoa loa i mea ia o inbreed.....

FOFOGA FETALAI: Malie le sui usufono mo Faleata Sisifo, sei faaauau lau inbreed pe a maea le saunoaga a le Palemia.

Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, ou te fia fesoasoani atili atu i le mataupu lea, e i ai le tatou faiga faavae foi lele a le Matagaluega o Faatoaga, mai lava i le amataga o le aumaiga o mea nei o lafumanu mai fafo ma faasoa atu i tua, a tele ona toe aumai lea o se vaega i le tatou Matagaluega e toe faasoa atu ai i isi ina ia suia, aua nei toe feusuai manu o lau faatoaga. O la e lava la e le i suia lena mea, ae na pau le mea, e lei tele ina faatinoina lena fuafuaga e ui o le toatele ia o tatou aufai lafumanu e lei faia le mea lea o le aumaia o latou manu e faatau mai i le Matagaluega, ona toe faatau atu lea i isi fai lafumanu e fesuisuia ai ma le tupu ai le mea lea o le feui ai o tina ma latou fanau. Ae pei la o se faiga lena, e i ai le mafuaaga, ma o lea foi ua agai i ai le Matagaluega. O le mafuaaga o le faigata foi lea ona o le tele o a tatou faatoaga manu e leai ni stock yard lelei toe taugofie e faatino ai. O lea la e i ai le faiga a le Minisita ma le Matagaluega o Faatoaga, o lea ua aumai a latou laau malosi e lua, o lea ua tatau ona taunuu mai. O laau malosi na e lua e fana ai faagase, e pei lava e fana i le u, e faagase le poa po o le manu fafine. O faiga la na e pei ona fai i faasao tetele i Aferika, ona mafai loa lea ona o atu le aufaigaluega aumai le manu ave i le isi fai lafumanu e fesui ai latou manu foi nei e faafeusuai ma faalelei atili ai le lafu. O le faiga faigofie atu lena, ae o lea e taoto foi pei ona saunoa atu le Afioga i le Minisita mo Faatoaga. A o le mea lea ua i ai nei, ua tele a tatou fai lafumanu mamoe. O le nuu lea o Fasitootua, o le matua tele o le lafu mamoe la e ua i ai, ae afua i le tulaga o lafu la ia, mamoe foi nei e fanau pau ma lafu mamoe masaga. Aua o le mafuaaga lena o lea e taua tele ai a tatou mamoe, o le masaga tolu, masaga fa, masaga sefulu. O mea na tatou te agai i ai, e atili ai ona televave le lafumanu a le tagata ia, a o le faalavelave, e faigata ona ou talanoa atu i le sui usufono mo Faleata Sisifo o lea e nofo i Vaitele, e leai ni ana faatoaga, e leai foi se isi o Vaitele o i ai ni mea faapena. A o tua i nuu i tua, ua i ai lafu mamoe ona o le taumafaiga a le Matagaluega.

FOFOGA FETALAI: Ia, tulai maia le sui usufono mamalu mo Faleata Sisifo e faai mai le saunoaga.

Tofa LEALAILEPULE RIMONI AIAFI: Faafetai i lau Afioga. E tasi lava le tagata i le Palemene lena e mafai ona faateleina mamoe mai se mamoe, o le mea foi lea na fai atu ai lou manatu, na o le Minisita mo Faatoaga, leaga foi o le Saienitisi e palua se vai ma fualaau. O lona uiga, na pau lea o le tagata e mafai ona palua se vai, a fanau le mamoe e tele ana toloai, a o le Afioga i le Palemia, e leai sona malamalamamaga i mea nei, ioe. O le mea lea ou te faamalulu atu ai i lau Afioga, a o au e le tele na o le 25 au mamoe la e i ai. E lua la mamoe lea e fai.....

FOFOGA FETALAI: Tulai maia lau Afioga i le Minisita mo Faatoaga.

Afioga Hon Le Mamea Ropati: E faamalie atu i le sui usufono mamalu, o au nei mo le palu vai foi lea e togafiti ai gasegase o tagata, ae le o i ai ni vai e mafai ona ou palua e faatele ai ni mamoe. O le mea la lena e pei e sese ai le mataupu lea e saunoa i ai si ou usu, ae le o le tulaga lena. O lo o taumafai pea le Matagaluega ina ia faateleina le mamoe aua o le talitonuga lea e i ai o le tatou Matagaluega, masalo o le a sili atu le mamoe mo i tatou i le lumanai i le fofoga taumafa. O le mea e lelei ai le mamoe e le tele ni ona faamai foi nei e maua ai. Ae a i ai la ni faamai o mamoe, o le mea la lena e come in ai loa au e palu se vai e tape ai le faamai ae le faafananau atili ai mamoe.

Ia, o lau soso atu lea ma le faaaloalo, ae faafetai lava i si ou uso.

FOFOGA FETALAI: Ua maea le taimi o le sui usufono mo Faleata Sisifo.

Tofa LEALAILEPULE RIMONI AIAFI: Ona faauma atu ai lea lau Afioga i le Fofoga Fetalai, e leai o le uiga o lau faamatalaga, faafetai atu i le Afioga i le Palemia ma le Kapeneta ma le Palemene sa fesoasoani atu i le suegatupe a le SCOPA lea sa fai, sa i ai la mamoe e lua ma le povi sa tunu vilivili ai, lea la ua faamaonia ai. Sa ou sau lava i le aso e fia fai se tala e faafetai ai i le tatou Malo i lea fuafuaga lelei. Faafetai foi i le Afioga i le Taitaifono, leaga o le faifaatoaga numera tasi o Fasitoota lea mo lenei Lipoti.

Ia manuia le tatou Fono.

FOFOGA FETALAI: Tulai mai le sui usufono mo Faasaleleaga Nu.2.

Susuga PAPALII LIO FAAVAIVAIOMANU TAEU MASIPAU (Faasaleleaga Nu.2): Faafetai i lau Afioga i le Fofoga Fetalai faapea foi le tatou Maota. E talitonu lava o le a agai tonu se manatu o lenei usugafono i le tatou Lipoti. Faafetai i lau Afioga i le Taitaifono ma le Komiti.

O le Fautuaga lea numera 3, e ese le taua i lou nei sui usufono, e le o mamoe a o manupapalagi, o povi. E ese le taua o lenei fautuaga lau Afioga i le Minisita, aua e talitonu lava o le galala o le aufaifaatoaga mo manupapalagi, povi i le taimi lenei, ua matua tele lava. E oo foi i lenei sui usufono e tulai atu, o lo o i uta foi i le aufaigaluega le talosaga ma nisi foi o lenei itumalo ma le matou motu i Savaii.

Mo le silafia lau Afioga i le Minisita faapea foi le paia o le Maota, o Savaii lava ia i le taimi lenei ina ua laitiiti foi le mea e agai i ai le tatou talo, o le manupapalagi lava lea ua tua i ai le aufaifaatoaga i le taimi lenei. E fia faamauina foi le faafetai i le Tofa Liomatua Alesana Gidlow le faipisinisi mai Lalomalava, o ia lea o lo o fesoasoani i le motu i Savaii e fesoasoani i le motu i Savaii e taamilo mo le aufaifaatoaga e manaomia se fesoasoani tau seleni. O i tonu lava lea e fesoasoani ai lenei tamalii foi o le atunuu i nai aufaifaatoaga i Savaii e moomia se seleni. O le mea lea, malo faafetai Lio mo le fesoasoani i le tatou motu.

A o le tatalo i lau Afioga i le Minisita ma le Matagaluega, e taua tele nai manupapalagi nei mo le aufaifaatoaga ona o lo o taatitia nai talosaga i le aufaigaluega ma le Matagaluega o lo o moomia nai fesoasoani mo Savaii ma le tatou atunuu atoa ma le aufaifaatoaga.

O tulaga ia o tatou uta manupapalagi lau Afioga, afai o le aofaiga lea e naunau le tatou Komiti ina ia aumai ia po o le ituaiga breed foi lea fou mai Ausetalia po o atunuu i fafo, ia e taua tele, ae afai o ituaiga breeds, ou te talitonu lava o lea sa saunoa foi le Afioga i le Minisita i se tasi o tatou Fono e silafia foi le Afioga i le Minisita mo Fesoootaiga ma Faamatalaga Tekonolosi, ia mea foi ia faaonaponei o le faa-Peretania o le artificial insemination, ou te iloa lava o se auala vave lena mo le tatou atunuu aemaise foi o auala faaneionapo ina ia vave ona salalau atu ia nei faasoia mo le aufaifaatoaga, ou te talitonu, e ese le taua o ia faiga. I lou lava sui usufono, ou te matua lagolagoina le fautuaga lea a le tatou Komiti e manaomia tele a tatou manupapalagi o povi e fesoasoani i le tatou atunuu, e toe faigofie foi i le aufaifaatoaga ona maua ai le seleni, aua na ona faamate lava, vaeatu le paia o le Maota ma le faafofoga mai, ma fua ma maua le seleni i le taimi lava lena. Pei o le agaga tonu lena o lou sui usufono e lagolagoina tele, faafetai i le Taitaifono ma le Komiti i le fautuaga lea numera tolu. Ma le faaaloalo i lau Afioga.

Afioga Hon Le Mamea Ropati: Lau Afioga.....

FOFOGA FETALAI: Ia o le a avatu pea i le avanoa, sei talifuaitau le Afioga i le Minisita. Tulai mai le Minisita.

Afioga Hon Le Mamea Ropati: Faafetai lava i le sui usufono mamalu i le lagolago mai i lea tulaga, ma o le mea o lo o tulai mai nei i le taimi nei, pei ona mae'a foi ona ou tauina atu i se tasi o tatou Fonotaga, o lo o taumafai malosi lava le Matagaluega ona o lea o lo o silafia lelei e le Matagaluega le agaga lea e saunoa mai ai le sui usufono e manaomia lava le povi. Aua pei lava ona ou fai atu, mo census ia e fai nei e le Matagaluega, ua vaaia ai le agaigai i lalo o numera o manupapalagi i totonu o le tatou atunuu, ona o le tulaga lea ua malosi tele le fai, vaeane lava le paia, i mea o faalavelave foi ia o le tatou atunuu, e leai foi se tatou tulafono e taofia ai lea mea, aua o mea masani lava a lo tatou atunuu. A o le isi foi mea lea e vaai ai le Matagaluega, e i ai foi nisi o lo o feoloolo lava nai a latou lafu foi lea ae o lo o taumafai le Matagaluega, pe mafai ona latou faatau atua i fafo i nai isi foi fai lafumanu o lo o moomia le fesoasoani, ia pe faatau mai foi i le Matagaluega, ona faatau atu lea i se tau feoloolo i nai o tatou tagata o lo o fiafia foi i lea ituaiga atinae i totonu o le atunuu. A o le mea lea e tulai mai i tatou manu ia e fia aumai i fafo, ua fai foi sina faigata o Ausetalia latou, ua pei ua i ai foi le aiatatau a manupapalagi latou, foi lele i le aumai, fai mai e aumai e stress mo manupapalagi i luga o vaa ia e aumai ai ae i ai foi nai nisi e pepe, i tagata foi ia o lea e fai mai nei i le aua le faatigaina ia mea o manupapalagi ma isi foi manu. O le tulaga tonu la lena o lo o faafaigata ai, o lo o fai pea feutagaiga ma nisi o le aufai lafu i Ausetalia, a o le mea lea ua fai mai le World Bank, e a pe a aumai se tatou uta foi lea i vaalele tetele foi lele lea o le 747. A o le mea lea e popole ai e le tele ai ni manu e aumai ia toe taugata. O le fuafuaga lea o le tatou poloketi foi lea e tau nei o le SACEP lea a le World Bank, o lea e manao le World Bank e aumai ni manupapalagi e ave i le Matagaluega e breed ai ia povi la ua i ai, vaeane le paia, ia ona tufatufa ai lea i tua i le aufai lafumanu. Ia o finauga foi i lea mea o lo o fai nei ma le manaoga a le World Bank e fai lava foi sina e i ai lava foi taimi e siisii ai upu i lea mea pei o le a

omai i latou ma pulea mai a tatou mea e fai, ae o lo o taumafai foi lele e faapea mai latou, ina ia foia ai le mea lea o le pepe o manupapalagi i luga o vaa ia aua e umi ona omai ma aumai ai, ae a aumai i le vaalele, na ona uta nei lava i le taeao toe taunuu mai i le aoauli. Pei o mea la ia o lea e vaavaai ai i vaega ia e lua, aemaise foi o le mea lea sa taua e lau Afioga o le mea lea o le artificial insemination. O le mea aupito i sili lava lea ona taugofie aua o sperms e aumai ia ona frees lea ona aumai lea ua inseminate i manupapalagi fafine ina ia fananau ai. So, o lo o fai pea ia fuafuaga a le Matagaluega i se mea pe faaaoga foi ma lea mea toe faaaoga ma le...aumai i le vaalele toe faaaoga e aumai i le vaa. O le mea e lelei ai le aumai i le vaa e tele ai ia manupapalagi e mafai ona aumai. E sao lelei lava le saunoaga, o le tele ia o talosaga o lea e tuuina mai, ae ua le lava ia le lafu a le tatou Matagaluega o lo o i ai nei, ia vagana la le aumai i fafo, a o le lelei o le aumai i fafo, ia ona tufatufa atu lea ina taofia foi lea o le inbreed o lo o i ai, ae o lo o ave pea le talosaga ia i latou o lo o feooloo nai a latou lafumanu e faatau, faatau foi lele i le tatou atunuu i latou o lo o moomia ina ia tau foia ai le tulaga. Pei o le faamalamalamaina atu lea o lea mataupu lau Afioga.

FOFOGA FETALAI: Malo. Faafetai i le faamalamalamaga manino a lau Afioga i le Minisita. E i ai se mea o e fia tulai ai lau Afioga i le Minisita mo Tupe Maua? Ia tulai mai lau Afioga i le Minisita mo Tupe Maua.

Tofa Hon TUILOMA LAMEKO (Falealili): Lau Afioga i le Fofoga Fetalai faapea foi ia sui usufono mamalu o le Palemene. E tulai atu e fia faaali foi se manatu e uiga i le Lipoti a le Komiti, ma e ou te momoli atu le faafetai i lau Afioga i le Taitaifono ma le mamalu o le Komiti ona o le Lipoti ua i luma nei o le lumamea. Aua o le Lipoti lenei pei lava o le tele o atinae i lou talitonuga, ae peiseai o le Lipoti lenei aemaise i mea tau faatoaga e aofia ai laau eseese ia ma manu, o se isi lenei mea taua i totonu o le atinaeina o le tatou atunuu. E tele ina ou lagolagoina vaega e lima ia na aumai i le Lipoti a lau Afioga i le Taitaifono ma le mamalu o le Komiti.

Ae ou te fia faamamafaina le fautuaga muamua o lo o faapea mai ai, ina ia faavaeina se vaega o maketi faapitoa mo le faatauina atu o fua o le laueleele i atunuu i fafo. E ala ona ou taua le tulaga lau Afioga i le Fofoga Fetalai le taua o le vaega lea, lona uiga e aliali mai o se vaega faapitoa ua saunia e le Malo e i ai ni tagata faapitoa ma lo latou iloa o tulaga o mea tau maketi. E le o po se lilo i le silasila a lo tatou atunuu i le taimi lenei i le manuia ua oo ia tatou, faafetai ai foi i le galuega a le Matagaluega o Faatoaga, e tele ituaiga talo eseese aemaise foi le tele o mea taumafa a lo tatou atunuu i le tele ma le lelei o faatoaga o lo o i ai nei. Ae le mafai ona e le o po se lilo i le tatou vaai, o lo o tau fai sina tulaga faigata o le maketiina i fafo. O lona uiga la, e manaomia...Sa i ai le taimi muamua i le amataga lava faatoa amata mai ona faavae lo tatou Malo, sa i ai se vaega faapea e tau o le Produce Marketing Division, o le latou galuega faapitoa lava e i ai uma lava tupe ma mea uma lava. O le latou galuega faapitoa o le sailiga o maketi i fafo, aua e le o po se lilo i lenei vaitaimi, pei ua agai lava ina faaaogaina. O la foi e lelei le tulaga lea i lou manatu i le faamalalosi o le tulaga lea e aumai ai ia tagata taitoatasi i le faatauina o tatou...aemaise lava le taimi lenei, lea ua lelei le tatou talo. O lona uiga la e tatau lava ona lava ia le galuega fesoasoani i le Afioga i le Minisita mo Fefaatauaiga faapea foi le Minisita mo Faatoaga ma

Matagaluega nei, ina ia faamalosi lo latou....i tagata, o le uiga o lau vaavaai atu i le Lipoti lea e aumai, ia faapitoa ni tagata faapitoa latou te faia le galuega ia o le fuafuaina o maketi i fafo, aua o le vaega aupito sili lea ona faigata o le faatauina atu i fafo.

O le isi vaega lona lua ou te fia talanoa i ai, e aliali mai i le vaai i ai, e le o lava lelei ia tagata i uta i le....ia afai e sese lau tala, a o le mea lenei e le o lava. O nisi vaega taua o mea tau faatoaga, o le i ai lea o le tagata faapitoa tagata foma manu, ae le o lava i le taimi lenei, e le o mafai ona lelei lo latou vaaiga ia ma fesoasoani malosi la ma foia ai le vaega lea tatou te oo soo i ai, o le lava o mamoe e faasoa atu i le aufaifaatoaga.

Lau Afioga i le Fofoga Fetalai faapea sui usufono mamalu o le Maota, o nai manatu na e fia faaalai e uiga i le Lipoti. Faafetai manuia le Fono.

FOFOGA FETALAI: Malo faafetai, malo saunoa ia te oe le Afioga i le Minisita mo Tupe Maua.

O le a tuuina atu le avanoa i le Afioga i le Taitaifono, pe i ai nisi mea e te toe fia tali o lea ua tali manino le Minisita e ala i mataupu na laga, ia ona avatu ai lea o le tatou fesili.

Tulai mai lau Afioga i le Taitaifono.

Afioga Hon LEAUEPE TOLEAFOA APULU FAAFISI: Malo faafetai. E momoli le faafetai i sui usufono mamalu uma pei ona saunoa ma malele foi i le taua ma le aoga o fautuaga sa laga mai e le Komiti e ala mai i lana Lipoti, ma e manatu foi e avea foi ia fautuaga ma mataupu laga e avea o se faamanatu i le Afioga i le Minisita ma le Malo i itu aoga ma itu e lelei ai le atinae o le itu tau le tamaoiga e ala lea i faatoaga.

Ae pau o se vaega....ma ua malele foi ma saunoa le Afioga i le Minisita ma le Taitai o le Malo e talifuaitea ma faamanino itu eseese uma ia pei ona laga e sui usufono mamalu, ma ua ou manatu ua manino ma malamalama lea itu. Pau o le itu ua ou toe tulai atu e toe faaali ai se manatu itiiti, o le saunoaga ma le lupe faalele lea pei ona saunoa i ai le Afioga i le Minisita mo Tupe Maua i se vaega lea pei ona taua i le vaega muamua o le Lipoti. Pei ona silafia, o le Matagaluega o Faatoaga, Vaomatua ma Faigafaiva, o lo o latou faia le galuega foi lenei o le fufuluina ma faavasegaina o le tatou talo mo le auina atu i maketi i fafo. Ia ma e tulai mai i le silasila ma le vaavaai a le Komiti, o se galuega aupito i taua tele, masalo e le mafai e se isi o le vaega lea e i luga ae e feagai ma le tulaga i le va i fafo ona latou faatino le tulaga lea ina ia maua le quality. O le taua lenei o le galuega lenei o lo o faatino nei e le Matagaluega o Faatoaga, Vaomatua ma Faigafaiva, o le latou filiina lea o le talo ma vaavaai lelei, ina ia maua le ituiga talo tonu e fetui mo tatou maketi i fafo, ina ia aua ne i toe tulai mai le mea foi lea o le alu alu ia toe taofi le tatou talo ua maua ai ni anufe ma ni tulaga faapena. E lagona ai le agaga faamalo ma le agaga faafetai i le Pule Sili ma le Matagaluega e auala atu i lau Afioga i le Minisita ma le Malo sa matou tala, ae o le fautuaga, ina ia silasila totoa o le a se faiga e fai ai ia atili mapo le itu lea ina ia aua ne i tatou toe see mai lo tatou le ausia o le quality e tatau ona ave ai le tatou talo i fafo. Ma le faaaloalo faafetai.

Na faamaonia le Lipoti.

FOFOGA FETALAI: E tusa ai ma le Tulafono Tumau 54, e ao i le Malo ona tuuina mai i le Fono Aoa se Pepa e tali atu ai i Fautuaga na tuuina atu i le Malo mai le Lipoti a le Komiti Filifilia ia le silia le 90 aso talu ona faamaonia e le Fono Aoa le Lipoti.

P.P.2013/2014 NU.85, LIPOTI A LE KOMITI O TUPE MAUA MA TUPE TOTOGI I LE P.P.2012/2013 NU.51 & P.P.2013/2014 NU.14, FAAMATALAGA O TUPE A LE KOMITI O PETIPETIGA MO LE TAUSAGA FAALETUPE FAAIUINA ASO 30 IUNI 2011 MA LE TAUSAGA FAALETUPE FAAIUINA ASO 30 IUNI 2012 - ILOILOGA

Susuga Hon PAPALIITELE NIKO LEE HANG (Taitaifono Komiti o Tupe Maua ma Tupe Totogi): E faafetai atu i lau Afioga i le Fofoga Fetalai mo le avanoa.

E muamua lava lau Afioga i le Fofoga Fetalai ona ou fia faaaogaina lenei avanoa e momoli atu ai faamanuiaga i lau Afioga i le Fofoga Fetalai ma le Afioga i le Palemia, ona ua aulia mai oulua aso soifua i lenei aso. O le tatalo ia faapena ona agalelei pea le Atua ia faafualeva oulua soifua laulelei aua le feagai ai ma tiute ma galuega fita o lo o feagai ai ma lau Afioga i le Fofoga Fetalai i le faafoeina o le Maota Fono, ae faapea foi le Afioga i le Palemia i le faafoeina o le tatou Faigamalo - malo le soifua.

Lau Afioga i le Fofoga Fetalai ua ou tulai atu ma le agaga faaaloalo ou te faatu le lafo, *Ina ia faautagia e lenei Fono Aoa le Lipoti a le Komiti o lo o tuuina atu ai ana SAILIILIGA, FAUTUAGA MA IUGAFONO.*

Faaluaina e le sui usufono mo Aleipata Itupa i Lalo ma le sui usufono mo Alataua Sisifo.

FOFOGA FETALAI: Tulai mai lau Afioga i le Taitaifono mo le faitauina o Fautuaga ma Iugafono.

Susuga Hon PAPALIITELE NIKO LEE HANG: Lau Afioga i le Fofoga Fetalai faafetai mo le avanoa.

“FAUTUAGA.

I le maea ai o Iloiloga a le Komiti na faaiugafonoina ai e fautuaina le Malo:-

- 1. Ia ave le faamuamua a le Faalapotopotoga mo le tapenaina o se Tulafono e tuufaatasia ai Tulafono Tau Taaloga i totonu o le atunuu e pei o le Tulafono mo le Faafoeina o Taaloga (Gaming Act), ma le Tulafono o lo o faafoe ai Taaloga Tau Petipetiga 1990 (TAB Act 1990). E manatu le Komiti e taua le i ai o se Tulafono e tasi e limataitaiina ai le faafoeina o taaloga ma petipetiga i totonu o le atunuu ma isi aiaiga e faasino i ai.**

2. **Ia faataatia Faiga Faavae ma Taiala e ao ona mulimulitaia e le Pulega ma le Komiti Faafoe mo le faamatuuina atu o fesoasoani tau seleni e le gata mo Faalapotopotoga Tau Taaloga ma isi Faalapotopotoga i totonu o le atunuu, ae aofia ai foi ma fesoasoani mo le atunuu lautele mo polokalame tau le aoaoga, ma fesoasoani mo togafitiga o gasegase.**
3. **Ia ave le faamuamua a le Pulega ma le Komiti Faafoe i atinae tau taaloga e pei o le sini autu na faavaeina ai e le Malo le Komiti Faafoe o Petipetiga.**
4. **Ina ia mataitu pea e le Pulega ma le Komiti Faafoe o Petipetiga nisi auala mo le faafaigaluegaina ai o tupe a le Pulega mo nisi tupe faasili, aua le siitia ai ma le faaleleia o atinae tau taaloga i totonu o le atunuu.**

IUGAFONO.

I le maea ai o Iloiloga a le Komiti e fautuaina le Fono Aoao, ina ia faamaonia:-

1. **P.P.2012/2013 Nu.14, Faamatalaga o Tala o le Tupe a le Pulega o Petipetiga mo le Tausaga Faaiuina aso 30 Iuni 2011;**
2. **P.P.2013/2014 Nu.51, Faamatalaga o Tala o le Tupe a le Pulega o Petipetiga mo le Tausaga Faaiuina aso 30 Iuni 2012.”**

FOFOGA FETALAI: Malo faafetai mo le saunoaga a lau Afioga i le Taitaifono. Malie le sui usufono mamalu o lo o tulai mai se i tuu atu muamua le avanoa mo le saunoaga a le Afioga i le Palemia.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, ou te fia talanoa i le Lipoti lenei. O le Lipoti lenei o lo o aumai i lalo o le suafa o le Minisita o Tupe ma e aofia ai tausaga e lua e faaiuina aso 30 Iuni 2011 ma le aso 30 Iuni 2012. O lona uiga o se vaega o le Lipoti lea, o lea e cover ai le taimi a o avea le Afioga i le Taitaifono ma Minisita o Tupe, o lea foi la e aumai malamalama ai le Lipoti.

Ou te momoli atu le faamalo i le Komiti o Tupe Maua ma Tupe Totogi i a outou fautuaga lau Afioga i le Taitaifono Papaliitele Niko Lee Hang, Sui Taitaifono Tafua, sui usufono Palusalua, sui usufono Lealailepule, sui usufono Tialavea, sui usufono Dr Afualo Wood ma le tama lea o Taefu Paulo.

Lau Afioga i le Fofoga Fetalai, e taua tele le Lipoti lenei ua aumai faapea foi ma fautuaga o lo o aumai. O le agaga na faatu ai le Faalapotopotoga lenei i le 1990, o le fesoasoani lea e le gata i taaloga i ni tupe maua, ae ia faaoga foi i aoaoga faapea foi ma so o se gaoioiga tau taaloga e aofia uma ai lava mea uma ia e lilifa i tulaga i fesoasoani, charity ae e le aofia ai ni Faalapotopotoga e agaga i le saili o a latou lava tupe mo le manuia o o latou lava sui. O lona

uiga la o so o se faalapotopotoga lava o lo o i ai le upu charity e aofia ai aoga ma taaloga, e lavea uma ai lava i le fesoasoani lenei. O le ala lena na mafua ai ona pasia le Tulafono lenei.

O le taua o le Tulafono lea ona i le taimi na felafolafoai ai le Palemene ma tuuina atu i le Komiti o Tulafono Tau Faaofi, na toe fiti mai iinei le Tulafono, na teena ona o le upu o taaloga tau tupe. Ona aumai ai loa lea fai le felafolafoaiga na tatala ai le avanoa e le Taitai o le Malo i le matou Vaega toatele e palota i luga o lou conscious po o lau lava faautautaga tatau.

Lau Afioga i le Fofoga Fetalai, na faitau le palota ma e le i faia o se palota e fulisia i leo. A saili mai a tatou Faamaumauga, na fai le division ma na fai le faitauga o le palota, ae na tuu mai le avanoa saoloto i le matou Vaega i lena taimi. Ona palota lea o le Palemia e tetee ae ou palota e lagolago le Tulafono ona o mea ia sa ou aumaia ona o le Tulafono o le Tulafono a au i le taimi lena na pasia ai e le Kapeneta, ae pei o le agaga foi lea i o tatou tagata ma le Komiti e tetee i lea mea o le pele tupe. I le tulaga aoao, o i ina lea na mafua ai ona teena mai e le Komiti o Tulafono Tau Faaofi. O le faitauga atoa pe a toe lau mai i fafo a tatou Faamaumauga, e 17 sui usufono na lagolagoina ae 16 sui usufono na teena. E tasi lava le palota na sao ai fai ai loa ma le tatou TAB, a o le agaga lena lea ou te tau atua ma o lo o i lalo foi o le Vaega 3 o le Tulafono i le interpretation o lo o faamatala mai ai o educational, religious, cultural ma isi charitable Faalapotopotoga e aofia ai la ma taaloga. Ua ala ona ou faamatalaina atu mea ia ona o le Lipoti a le Komiti lea e sau ai fautuaga ona e faigata tele ia te au fautuaga nei.

E tolu fautuaga ma o le fautuaga muamua: ia ave le faamuamua a le Faalapotopotoga mo le tapenaina o se Tulafono e tuufaatasia ai mea uma lava. O isi taaloga e tai pei o le bingo o la e i o i le Matagaluega o Leoleo, ae vagana lava la taaloga ia o le TAB ma tuuga solofanua lea na mafua ai le Tulafono. O tuuga solofanua foi ia e fai i atunuu i fafo ae peti atu iinei, a o lea la ua faaopoopo atu i ai le casino e pei o mea na e tauave e le TAB, a o isi la mea o la e tuu lava i o e tauave e le Matagaluega o Leoleo.

Ia te au lava ia ua leva ona aumai manatu ia e tuufaatasi, ae sa ou teena malie ma taofiofi ona o le tulaga lenei, o lea lava e lelei ona faatino e le Matagaluega o Leoleo. Ona o le tulaga lenei, o la e faaaoga e o i lalo o le Tulafono tuai, lea e faaaoga e Ekalesia ma nai faalapotopotoga laiti e fai ai nai a latou suega-tupe e fau ai falesa, a o le mea lena o lea e mananao le vaega lea e aumai iinei ma e aumai loa iinei lau Afioga i le Fofoga Fetalai, o lea ua i ai le Tulafono e uunaia ai faalapotopotoga ia matua sue tupe e ala i lalo o o latou tiute tauave. E aumai loa i ina lau Afioga i le Fofoga Fetalai, oti loa taumafaiga o lo o taumafai i ai faalapotopotoga ma Ekalesia. O le mea lena e matua faigata ai ia te au le mea lea ona o lea ua aumai iinei e tuufaatasi ae ia i lalo o le Pulega o Petipetiga.

Ia te au lava ia ua lava ma totoe le mea le la e i ai, o lea ua toeitiiti fa tausaga o faatali le casino. O lea foi e faitio i mea ia o ponesi. O lau fautuaga i ai, "Se e le o mea ia, e ala ona paupaua a outou taumafaiga o le le tuu i luga faamaualuga o le tau o se'i nei e fai i a tatou lotto." Vaai foi i ai e oo loa i le \$500,000 e pei o le a le timu to o tagata e o atu e faatau? A tuu maualalo, o le mea lena e pau foi le tupe e maua.

Lau Afioga i le Fofoga Fetalai, o le faigata muamua lena ia te au. O le Fautuaga muamua la, ou te taofi o lea lava e lelei i o i le Matagaluega o Leoleo aua na o le pau lava le mea e vaai i ai Leoleo ia, ia totogi atu le bingo

a lea Ekalesia ma lea Ekalesia. Ona pau lava le mea e vaai i ai i latou o le totogi ma o e vaai po o le Ekalesia moni faatasi ai ma le totogi o a latou lafoga, ae ua tele lava ina ou fautuaina le Komiti lea, "Se e le o mea ia e sue ai a outou tupe, ia fai faalelei prizes o lulu." O le mea lena o lea e tataua ona agai i ai outou. O lea e le toe tau atua, se i vaai o taimi uma lava e oo loa i le \$300,000 po o le \$400,000 o le matua tauaoga e fai, a o lea lava tatou te tigaina i mea nei o ponesi ma nai bingo o lo o sue ai seleni a nai aulotu vaivai ma tagata o lo o faatinoa mea na mo fesoasoani i Ekalesia? O lea ou te malamalama lelei i le agaga o le Komiti, o le agaga e lelei, o lo o sau lava latou ia tele ni tupe. O la e la e lelei le agaga, a o mea faapenei, e faaoga i ai le faautautaga tataua. E i ai le isi manatu fai mai o le faaoga soo o le mea lena o le faautautaga tataua e fai ai mea sese. Ia te au lava ia, o le faautautaga tataua po o le conscious, o le Tulafono Faauro lea na aumai e le Atua e taitai ai tagata uma lava. E mulimuli mai talaiga a le Au Misionare iinei ma omai e aumai Tulafono e 10 a Mose, ae omai o a mea o fai iinei? Pulega a nuu, ava i ou matua, aua le fasioti tagata, aua le gaioi, aua e te alu fua i le toalua o le isi, aua le molimau pepelo. Ua lea lava ona i ai i Samoa. E mulimuli mai talaiga o le talalelei, a ua lea ona i ai le Tulafono o le faaoga o le faautautaga tataua, conscious. O le ala foi la lena, po o le Minisita e na te faia e tulai mai ia te ia i ona luma se faaiuga fai, pe tolu faaiuga ia e tulai mai, e tasi lava le faaiuga o le tolu lena e sao. Ae na te tagofia loa le 2 po o le 3 ae tuu le sao, sese loa. Aisea? Leaga foi o le Tulafono o le faautautaga tataua, na ola mai loa le tagata tuu loa i ai e le Atua, ae faatoa soifua mai nei ananafi Mose tusi le Tusi Paia ona faasalalau mai ai lea o le talaiga. E toatele lava tagata faapaupau e tausisi i le conscious, o la e i luga i le lagi, ae toatele tagata lolotu e talepe le conscience e le o i le lagi o la e i Seoli.

Lau Afioga i le Fofoga Fetalai, o le vaega lua, ia faataatia faiga faavae e ao ona mulimuli ai le Pulega mo le faamatuu atu o fesoasoani tau seleni e le gata i Faalapotopotoga tau taaloga, ae o isi Faalapotopotoga i totonu o le atunuu ma polokalame tau aoga, togafitiga o gasegase, charity, lea e aofia i totonu o le manulauti lea na i ai i le 1990. Ua ou vaai i le Lipoti, e pei e foliga mai e lilifa na o taaloga. E le na o taaloga na fai ai le Tulafono lena. O lona uiga, o lea foi ua answer i totonu o le Tulafono, e aunoa ma le fautuaga lona lua.

Ona ou sau lea i le Fautuaga Lona 3 - Ave le faamuamua a le Pulega ma le Komiti i atinae tau taaloga, e pei o le sini autu na faavae ai e le Malo le Komiti Faafae, ou te leai atu i le mea lena. E le na o taaloga na fai ai, o le Tulafono o le Tulafono a au na fai, e le na o taaloga na faavae ai. O lona uiga o lea ua tali lava i totonu o le Tulafono.

O le mea na ala ai ona ou laga le mataupu lea, ona o lea e pei e atagia i upu o le Lipoti e faapea; ua alu i isi mea, ae faataatia ese taaloga. A o a isi mea? O aoga, o lea e matua tamau i lalo o le vaega o le Tulafono. Lau Afioga i le Fofoga Fetalai, a o le Fautuaga 4, ou te matua lagolagoina le Fautuaga 4. E taua tele le Fautuaga 4. O le ala lena o lea ua ou taofia ai lau Afioga i le Fofoga Fetalai, e taua tele le Fautuaga 4 ia te au, a o le 1, 2 ma le 3, o mea lava na o lea e faatino i le Tulafono. A o lea foi ou te malamalama lelei i le agaga o le Komiti, e pei o le agaga o le Komiti ia tele tupe ia maua, a o lea ua ou fai atu, e faaoga foi ma le faautautaga tataua. A tatou liliu i le Tusi Paia ma tatou tilotilo, o mea lava ia e aoga mo i tatou, e tele lava taiala. Ae a Tulafono a le Atua la e i ai, "E sa ona e taina se tupua ua ta ma e tapuai ma ifo i ai." Lau Afioga i le Fofoga Fetalai, na ona aumai lava e le Atua le mana

ia Isaraelu, feoti, utia i gata uogo, ona tatalo lea o Mose. Fetalai le Alii, “Alu e gaosi ifo ni gata i omea ona ave lea e fai se laau faalava ma tautau mai luga, mea e fai i lima, o le tagata tilotilo i ai, e ola.” O mea e fai i lima. Ona toe fau foi lea o le Atolaau o mea e fai i lima, tuu i ai Tulafono i totonu, feaveai, o mea e fai i lima. O le a le mea e tau mai i ina? O le Tulafono o le faautautaga tatau, faaaoga.

Lau Afioga i le Fofoga Fetalai, o le faautautaga tatau lena o lea e i totonu o le Tulafono, o lea ou te tatalo atu ai i le Komiti, e talia le 4, a o le 1, 2 ma le 3, o lea lava e faatino e le Tulafono i le taimi lenei, ae ou te popole e oo loa i ai, oti uma loa taumafaiga a i latou o Ekalesia ma Faalapotopotoga o lo o faaaoga isi mea ia pei o bingo latou te faatinoina. O le ala foi lena na vevela ai lava ma tetee i le Casino, ou fai atu loa, lelei, afai o le mea lena tou te mananao i ai, taofi uma mea faapea e aofia ai ma bingo, o le a la le mea a tatou o le a fai i ai? Ia ona faapena lea ona sologa malie le tulaga na i ai le tetee i lena taimi lau Afioga i le Fofoga Fetalai.

Ia, o si au tama'i agiagi lena i le Tulafono Tau Faaofi lenei ma le Lipoti matagofie a le Komiti.

FOFOGA FETALAI: Malo faafetai i le saunoaga malamalama a lau Afioga i le Palemia. E manatu foi ua malamalama ma manino le Maota e tusa ai ma lou finagalo. Ia, ou te faamalulu atu i le Maota ona o lea ua tatou taunuu i le tatou taimi malolo, o le a tuuina atu le avanoa mo le faaauauina o saunoaga a sui usufono mamalu aemaise foi le tali aloaia a le Afioga i le Taitaifono pe a maea ona faagasolo taualumaga o felafolafoaiga.

Ou te faasilasila atu ua faataatia ese Tausalumaga a le Fono Aoa mo lana malologa masani o le taeao.

Na faataatia ese Tausalumaga a le Fono Aoa mo lana malologa masani i le itula e 10:44 ma toe faaauau i le itula e 11:16 i le taeao.

FOFOGA FETALAI: E i ai le talitonuga ua maua le faatiliga malos i lenei vaega o le aso, aua le palega auau ma le taliga o le sua i le paia ma le mamalu o le Maota. Faafetai i le Atua i kalasia ua foai, o lea foi ua tatou molimauina le faatinoina o le faaaloalo a le Afioga i le Palemia, na tuuina mai ai le keke teuteuina lelei aua le lufilufiina e lo outou mamalu aemaise le tatou taligasua, atoa ai ma le taga falaoamata e faaauau ai taumafataga o le malu taeao a le tatou Maota o Tofilau Eti Alesana. O le a i ai se taimi auliuli ona oo mai foi lea o se faaaloalo a lenei itumalo, ae faafetai atu o lea ua maea ona taunuu mai le faaaloalo a le Afioga i le Palemia. O se taimi ona pati lea o le agatonu i le tu ma le aga faatamalii i le ava o ipu ma tulaga masani o le tatou va nonofo ai, ae faafetai o lea ua maea ua maua lo outou malos e ala i le tino e faaauau ai le tatou galuega.

E faia le tatou malologa ua maea ona tali faamalamalama le Afioga i le Palemia e uiga i le tatou Tulafono Tau Faaofi i le Lipoti a le Komiti, ma ua avanoa mo a tatou felafolafoaiga.

Ia sei tulai mai le Afioga i le Taitaifono ona tuuina atu lea o le avanoa i le sui sufono mo Faleata Sasae.

Susuga Hon PAPALIITELE NIKO LEE HANG: Faafetai atu i lau Afioga i le Fofoga Fetalai mo le avanoa. Ou te manatu foi ua sao i alo le taligasua i lau Afioga aemaise o le paia o le Palemene, aua foi se faasiliga malosi e faaauaaina ai le tatou galuega i lenei aso.

Ae ua ou tulai atu ma le agaga faaaloalo, e muamua ona ou fia faafetaia le saunoaga matagofie a le Afioga i le Palemia i le tulaga o le matou Lipoti, ona e faanoanoa lava i le faalogologo atu e tolu fautuaga ua le talia e le Afioga i le Palemia, ona o ia e ana le Tulafono ma ou te talitonu foi e tele lona silafia i lenei Tulafono. Ae ou te fia tautala lau Afioga i le tulaga na mafua ai ona aumai fautuaga nei a le matou Komiti.

O le Fautuaga 1 lau Afioga, sa matou aamia le Afioga i le alii Pule, le Afioga a Oloipola Terrence Betham i ni tulaga foi nei aua o Annual Reports sa faatalatalanoa ma ni tulaga o lo o faapena ona aafia ai le faagaoioiga foi o lenei Faalapotopotoga taua a le Malo. Sa tau mai e le Afioga Oloipola, e tatau ona silasila le Malo i se tuufaatasiga o Tulafono nei e lua, ona o lona talitonuga, o ia o lo o vaaia lenei foi Faalapotopotoga, e le o amiotonu le faafoeina e le lala lenei o le Tulafono lea e faafoeina e le Matagaluega o Leoleo. E le o se taufaaleaga atu foi i le Afioga i le Minisita po o le Matagaluega, a o mea moni ia na tuuina mai i le matou interview, ma na oo mai foi le Afioga Oloipola ma le faamaoniga, i le tulaga lea e faaoga e ni tagata faipisinisi laisene nei e suetupe ai mo latou lava interest. A o le Tulafono e manino lava ma malamalama le matou Komiti, o le Tulafono e ave pei ona saunoa le Afioga i le Palemia, e ave i Faalapotopotoga foi nei, charity. O le tulaga la lea ua talitonu ai le Komiti, ua tatau ona toe silasila le Malo i le Tulafono lenei pe a faapea e le o lelei ona faafoeina e se Matagaluega se vaega o le isi Tulafono. Ma sa talia foi e le Komiti le fautuaga a le alii Pule, ona o le taumafai atu lea ina ia soalaupule lelei lea mataupu, ona e manatu le Afioga i le alii Pule, ua leva ona tulai mai le faafitauli lea ona o le lua o Tulafono. A tasi se Tulafono, ona faapena lea ona soalaupule tulaga ia o faafitauli na tulai mai.

Lau Afioga ma le Fautuaga 2, e le teena foi se manatu o le Afioga i le Palemia, ae talitonu lava le matou Komiti, e le o faapea – o lea ua i ai faiga faavae, o le mea moni lea. A o le tulaga lea e tau tuliloa atu i le matou fautuaga, aumai ni guidelines ona o le Lipoti, e tau mai i Lipoti ia le eseese o aofaiga o tupe e ave i faamanuiaga i mea tau aoaoga. Mo se faataitaiga lau Afioga, o le aoga a le isi tamaitiiti, e \$150, o le isi tamaitiiti e \$200, o le isi tamaitiiti, e \$50. E pei o le eseese la lea na fautuaina ai, aumai ni guidelines foi nei e fai ma faiga faavae ina ia laugatasia ai faamanuiaga ia, ae le faapea... Na fesiligia foi la le alii Pule po o le a le faavae, ae faapea mai, “E fai lava e le Komiti Faatonu le faaiuga.” A o le fautuaga a le matou Komiti, “Aumai ni guidelines ina ia laugatasia uma ai faamanuiaga faapea.”

O le tulaga foi la lea i le Fautuaga 3, lea foi e teena e le Afioga i le Palemia. O le agaga foi lena o le Komiti, e malamalama foi le Komiti o mea lava tau taaloga ma isi ituaiga fesoasoani e ave i ai. Ae pei lava o le agaga lea na tuuina atu, ina ia atiae pea taaloga e pei lava o le malamalamaaga lautele o tagata, o le TAB, na faavae mo taaloga, ae leaga la e le o malamalama le mamalu o le atunuu i isi tulaga ia e ave i ai faamanuiaga. E pei o le tulaga la lea, ou te le o fiafia la i le teena o matou fautuaga, ona o fautuaga nei sa faavae mai i matou sailiiliga ma faavaeina i ni o matou talitonuga, o tulaga nei e tatau ona fesoasoani i le Malo e faalelei ai lenei Faalapotopotoga. Ae

faafetai ua matua malosi lava le fautuaga ua matua talia lelei e le Afioga i le Palemia.

E pei o le fautuaga lena lau Afioga, ina ia malamalama foi le mamalu o le Palemene i la matou foi galuega, e le faigofie, ae pau lava o mea ua oo i ai la matou sailiiliga ina ia aumai ni fautuaga talafeagai, ae faanoanoa ona o lea ua teena e le Afioga i le Palemia. Ma lou faaaloalo tele.

FOFOGA FETALAI: Malo faafetai i lau Afioga i le Taitaifono mo le sauniuniga.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai.....

FOFOGA FETALAI: Ia sei tulai mai le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Pei lava ona ou fai atu, o le TAB e i lalo i le Minisita o Tupe. O lona uiga o lea faamatalaga, o lea e pue i i le afa muamua sa i lalo i le vaaiga a le Susuga ia Papalii ia le TAB, e lei faia la e Papalii i le taimi lena ou te lagona e tele foi lona pisi. Ae o le mea lea na ou talanoa atu ai, o le mau lava lena a le vaega lea e vaai le TAB, aua foi e mana lava latou ia tele se latou seleni e faatino ai a latou fuafuaga. O le isi fuafuaga tele lava a le Faalapotopotoga lenei, o lea e ave ai a tatou faatosina ia i latou foi nei e o i taaloga maua mai a latou pine auro, e fai la e le tatou Kapeneta ia faaiuga ia ona lafo lea ia i latou, e tele lava le latou galuega lena. Ou te manatu foi, tasi lea auala o lea na tele ai a tatou pine auro i le taaloga lenei na fai nei i le 2009, ma o se uluai taimi foi lea na maua ai ni a tatou pine auro i Taaloga Faava o Malo a le Taupulega, ae ua silia i le 40 tausaga o tatou auai e leai ni pine auro e maua mai ai i ina, ae ua maua ona o le faiga faavae lea e aumai e latou e faatupe mai e latou ia seleni e faatino ai ia prizes nei po o togi nei mo latou e avea o faatosina mo i latou e maua pine auro, toe tasi lava le taaloga lea e agai ai tatou, toe o Taaloga o le Olimipeka, o lea la e i totonu o tatou aiaiga o le Tulafono. Masalo na laaloa ai le vaai a le Komiti ae o lalo i le Interpretation Section, na o lo o tau atu ai ia mea ia ou te talanoa atu ai, lalo i le Interpretation Act o le Main Act.

O lona uiga la, e leai lava se mea e popole ai o lea lava e faatino o outou finagalo ia na aumai, o la e faatino i le taimi nei, e leai se mea e tau teuteu ai fua le Tulafono. A o le popolega lena i le tulaga lea o le naunautaiga lava o le Faalapotopotoga ia o le sue tupe, a o mea ia lea e faalagolago i ai i latou o ekalesia ma faalapotopotoga, o nai tamai faalapotopotoga lava, e oo lava i isi groups laiti i totonu foi o le Malo e i ai nai a latou lava mea e fai e fesoasoani ai i mea o maliu ma mea faapena, ae le tele lava se seleni e alu ai, o mea o social activities ia a tatou mo cultural activities e laitiiti lava le laisene e totogi ai, ona o la e alu soo lava i o i le ofisa po o le Matagaluega o Leoleo. Afai la o i ai se lape i ina, o le lape o le lape a leoleo, a o le mea lena e tatau ona omai latou e vaai, ae le faapea o le a avea le sa o se tasi o se tagata o fai sana ponesi faapena faapisinisi, o le a suia atoa ai le mea, ia ona avea lea ma mea e fai ma sasa ai ia i latou ma faafaigata ai fua mea faigofie. O mea ia o lo o tua i ai ia ekalesia mo galuega lelei faapena. Lau Afioga i le Fofoga Fetalai, o le tulaga lena o lea e mafua ai ona ou tulai atu. O le itu foi i le amataga o lea

e aofia uma ai lava ma taaloga, o lea foi la sa taua nai fesoasoani ia, o le isi lea mea faigata, e alu lava ae i ai le upu foi lele, consider a request on its own merits, o lona uiga, e leai se mea o le a ta aofai ai fua e i ai lava le tagata e sulufai mai i le Faalapotopotoga e genuine i le tina aemaise o si tina e sulufai mai ma faapea mai, ua ave lou toalua e falepuipui, toe lava o au le tina ae toalima le fanau lea e tau faa-aogoga, ua televave mai le pili e totogi, lea la e i ai nai tamai pili ia, a le totogia ua tutuli lau fanau, o ituaiga mea faapena. E aumai la nai tamai mea faapena ona tilotilo lea i ai o le Komiti e faavae ai lea o le latou faaiuga, ae a tamau loa faapena, lau Afioga i le Fofoga Fetalai, o lona uiga ua lava uma i i le atunuu, o le mea lena e popole i ai, aua ne i faia ni faiga faalauaitele aua o le mea e oo i ai, e ala lava ona ave le fesoasoani i le o lo o moomia le fesoasoani. Ae leai se mea o le a faalauaitele ai fua, ona e le taitai lava tupe ia, matua le taitai lava. A tilotilo i ai e laitiiti lava seleni ia e maua e faatino ai a latou fuafuaga i taaloga ma nisi o galuega e moomia. E i ai le isi tausaga ua le iloa e Minisita, tifa mai lea loomatua, o le mea lava e tasi, e toalima le ma fanau o le tamaloa ua mai, ae o le a ulufale i le Iunivesite ia le afafine e moomia lava se tulaga o se pili. O le tulaga lena na ala ai ona fai le iuga a le tatou TAB, faia ia ni sikokasipi se 30, o lea la e mafua ai sikolasipi e 30 la ua fai i le Iunivesite a le TAB e fesoasoani ai i tulaga faapea, ae a alu ai lava i le tulaga o le tamau, lau Afioga i le Fofoga Fetalai, e i ai le mea lea ua tupu, o lea lava tatou te molimau, o taimi sa tatou aogoga ai, o le toatele ia o tatou sa tutuli ma aoga i le le totogia o pili ae tatou te o lava, pe vaiaso pe lua ta te nofo ai i tua e taumafai lava si o ta tama ma si ou tina e sue mai le pili, na lavea ai foi au, e atoa le isi lua vaiaso o tuli ai ma le aoga, ia ona ua maua lava o le pili, sau le toeaina, ia vaai o lea ua maua lou pili. Ia a o le a le mea lea ua tupu nei? Ua tele ia tamaiti ua totogi e le Malo o latou pili. A o lea lava e i ai lava tagata e omai lava fai mai e le mafai, e le mafai, a o lea ua tele ina miti e le Malo mea faapea.

Lau Afioga i le Fofoga Fetalai, e pei o tulaga na, e alu alu foi, e le mafai lava ona le taumafai le Kapeneta i Minisita nei e tau saili tau saili, se tulaga e fesoasoani ai i o tatou tagata, pau lea o le mea e fesoasoani i ai, ae ave le fesoasoani i lē ua tatau ai le fesoasoani. Lau Afioga i le Fofoga Fetalai, pei o le tulaga lena, ae o lea ou te malamalama lelei lava i le mea lea e fai mai ai le Komiti, afai e 200 le mea e faatulaga le 200 i tamaiti uma a Samoa, o, o lona uiga e taai fala le mea lea e le mafai ona faaauau, a o le tuu pea o le avanoa i le Komiti e fai e latou i le latou tofa fetalai, o le uta a le poto o le fetalai. Lau Afioga i le Fofoga Fetalai, e faigofie lava e le faapea o se eseesega tele, o le mea lava o lea lava e fai. Ou te manatu atu ai, e matua le talafeagai le 1, 2, 3, a o le 4 ua matua talafeagai. Ou te toe faatuina atu, tatou talia le 4.

Afioga Hon Palusalua Faapo II: Lau Afioga i le Fofoga Fetalai, o se mea e fia faamalamalama.

FOFOGA FETALAI: Malo faafetai. Ona....Ia toe tulai mai le Taitai o le Itu Agai.

Afioga Hon Palusalua Faapo II: O lea ou te tulai atu o au o le sui o le Komiti o Tupe. Ma lou faaaloalo lau Afioga i le Fofoga Fetalai, o faaiuga ia e aumai e le o se faaiuga a le Taitaifono le Afioga ia Papalii, o faaiuga a le Komiti i le latou suesuega auiliili. O le mea lea e saunoa i ai le Afioga i le

Palemia, e sao o ia na faia le Tulafono, a o le faafitauli ia e tulai mai, o faafitauli ia e lei tilotilo i ai le Komiti. O le faaitaiga.....

FOFOGA FETALAI: Ia o lea ua maua, sei tulai atu le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le tausaga e 1984 na aumai ai le Tulafono iinei, o le Tulafono o le Iunivesite, e fitu lelei Teuteuga na aumai ma fautuaga, o le isi fautuaga, talia sui usufono e mafai ona o i totonu e pulea ia le Central Bank le Faletupe Tutotonu talia sui usufono e mafai ona o e pulea, ana talia sui usufono, na o se Faletupe e gau i le lalolagi. Lau Afioga i le Fofoga Fetalai o lea ua uma ona fola atu, e le faapea o ni mea a aumai fai mai lava le Komiti e talia, ona talia pogisa lava lea. O lea foi e tilotilo e le o se rubber stamp le Maota lenei, na ona aumai lava o le Lipoti talia, aumai le Lipoti talia. E tatau foi ona tilotilo i ai ia a outou faaiuga. O lea la ua uma ona ou faamatala atua ia le mea e le talia e le Malo le 1, 2, 3, aisea? Leaga o mea o lea lava e fai. O le a le mea o le a suia ai fua le Tulafono o lea e i ai lava le Tulafono o lea lava e faatino? A o le 4 ua matua selau pasene.

Lau Afioga, e leai se mea e le faapea o le a le talia ona le faia ai loa lea, o lea e faatino mea ia, ae e taua foi i tatou Komiti ona silasila totoa i mea tou te faia. Ia manatua o lea foi e saofafai iinei ia e sa i totonu o Komiti na ma pasia atu Tulafono na, aua ai ne i aumai se mea faaletonu.

FOFOGA FETALAI: E manatu ua malamalama le finagalo o le Afioga i le Taitai o le Itu Agai.

Afioga Hon Palusalua Faapo II: Lau Afioga e puupuu lava le mea lea, a?

FOFOGA FETALAI: Ia sei faaauau mai la.

Afioga Hon Palusalua Faapo II: O lea la e manino i a tatou Tulafono Tumau, e 90 aso tali mai le Malo, avatu le avanoa e iloilo ai e le Minisita ma le Matagaluega, fautuaga ia e avatu nei, ia ae pei e lagona le faanoanoa o lea ua aumai i i, ae ua tipi motu lava, vaeatu le faafogafoga.....

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e leai se mea e faanoanoa ai le sui usufono, ae tatau ona faafogafoga mai. O le a le mea o le a toe sui ai le mea o la lava e fai, e tatau ona faafogafoga lelei mai. E le o faapea o teena i luga o se isi tulaga, a o le faatele galuega, o la e fai i le taimi lenei.

Afioga Hon Palusalua Faapo II: Lau Afioga i le Fofoga Fetalai o se mea e fia faasao.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le faalavelave lea e le o faafogafoga mai e le o taumafai foi le Taitai o le Itu Agai e fia malamalama. A o le tulaga lena, o lea ou te fautua ai i le tatou Maota, talia le 4, a o le 1, 2, 3, malie, e le uma le fai aso o le Atua.

FOFOGA FETALAI: Ia ou te manatu o lea ua malamalama le folasaga a le Taitai o le Malo, ua malamalama foi lou finagalo lau Afioga i le Taitai o le Itu Agai ma le sui o le Komiti.

Afioga Hon Palusalue Faapo II: Na o sina mea e i ai faafitauli o lo o tutupu, e i ai faafitauli ia e.....

FOFOGA FETALAI: Le Taitai o le Itu Agai, se ia outou lauamatootoo i le tatou galuega lea e taumafai atu ona malamalama lea. A tatou savali lava i faiga faavae ma aga faa-Palemene ona manino lea o se mataupu. Aua le te i le uluga i saunoaga ma tali atu a le Malo i taimi lenei o felafolafoaiga, leaga o lo o tatala pea i lalo o tatou Tulafono Tumau taimi o felafolafoaiga ma le taumafai a le Malo e tali atu. A o le procedure lava ia o lena ua outou silafia, e uma ona tali aloaia mai lea o le Malo i le 90 aso, ona manino ma malamalama lea atugaluga na i ai le sui ma le faamalamalamaga o tatou mataupu, ae aua e te te i o le faaiuga lea o le mataupu. A tatou o lava i faiga faavae ma mea uma, a o le taimi lenei, ina ia malamalama leaga e galo ma mau upu. A o le taimi lenei o lea tali atu ma tuufofoga atu le tali a le Malo, ona tuu lea i ai o tali manino i ala tusitusia pei ona faataatia ai le tatou Tulafono Tumau. O le faamalamalamaga lena ina ia manino ma aua ne i tosoa faapea ua tatou faia se faaiuga i le aso, e leai, o lea e manino ma malamalama faiga faavae.

Tulai mai le sui usufono mo Faleata Sasae.

Tofa AVEAU TUALA LEPALE NIKO PALAMO (Faleata Sasae): Faafetai i lau Afioga i le Fofoga Fetalai, faafetai foi i le Malo i le Afioga i le Palemia aemaise foi o le Taitaifono i sui o le Komiti i le faamalamalamaina o lenei Lipoti. Sa faalogologo lava ma le totoa i saunoaga foi ma e i ai nai mataupu ia e lei oo i ai ia saunoaga pei ona tuanai atu nei ua ala ai ona ou tulai atu.

Muamua e momoli lau faafetai i lenei foi Faalapotopotoga ona o le latou sao i vaega eseese o le atunuu aemaise lava i taaloga. Ou te masalo o se tasi lenei o Faalapotopotoga ua ala ai ona mafai ona faataunuu le tele e le gata i miti a tatou au taaalo, a o le taumafaiga foi a tatou autaaalo e tasi. O lea la e i ai lau fautuaga i le Afioga i le Taitaifono aemaise foi le Faalapotopotoga. I le taimi lenei i le faatulagaina o fesoasoani a TAB lea e ave i taaloga, e pei e faamuamua lava i au foi nei e masii i fafo po o international competitions ia e fai i fafo po o ni sauniuniga foi nei i ni taaloga e fai mai i totonu i inei. A o le taimi lea e tapena ai le alii po o le tamaitai taalo e sauni e alu e represent Samoa i fafo, e le mafai la ona oo i ai le fesoasoani lea, e le gata i tagata taitoatasi, ae faapena foi i au, mo se faataitaiga o se auvoli o lo o taumafai e ave i fafo. Na pau le fesoasoani e mafai ona ave i ai, o le taimi lea e malaga ai e ave e fesoasoani ai e pasese i fafo pe sauniuni ai i taaloga i fafo. O lea ou te tatalo atu ai i le Komiti ma le Faalapotopotoga lea, pe mafai ona tagai ane i le vaega lenei, aua silasila lau Afioga i le Fofoga Fetalai, a le lelei le tapenaga ma le sauniuniga o se tagata, e le lelei foi lana taumafaiga i fafo. O lona uiga, e tatau ona faamuamua le tapenaga lea, faatoa tilotilo ai pe mata e maua se ai o le taumafaiga lea a le tatou vaega i fafo.

O le vaega lona lua o lou manatu, e i ai lou manatu o lea ua faamatuu e le vaega lenei isi laisene lea i le Faalapotopotoga lea a le Digicel ma le Bluesky,

lea e faatino ai mea ia o Text to Spin ma isi taaloga ia fai tupe i le vaega lea. O lau fesili i le Faalapotopotoga, o le a le faatinoina o lea foi vaega o le laisene ua faamatuu atu. Aua o le laisene lea e i le vaega lea, e ese mai la le laisene lea e aumai le Ofisa o Leoleo, lea sa i ai faamatalaga nei. O laisene ia, e pei ona silasila i ai le mamalu o le atunuu ma le mamalu o le Maota, toetiiti lava po uma e fai ai le sei lea. A ou te fesili, e le lava tele foi sou malamalamaga i le Tulafono, e pei lava ou te tau iloa e i ai se mea i totonu o le Tulafono o le 60% o se vaegatupe e maua mai ituaiga vaega faapea e tatau ona faamatuu atu i mea ia o charities po o mea ia o faailoga, po o a ni faailoga e fai. Po o le a se suesuega o faatino e le Board lea a le TAB e maitau ai la vaega ia e lua pei ona ou tauina atu, le vaega a le Digicel i le latou vaega lea e fai ma le Bluesky. E taua o lo o maua ai foi seleni, ae i ai lava lou agaga, o lo o abuse foi i le isi taimi, vaeatu lava le gagana le faatinoina o le laisene lea aua o le laisene lea e alu atu i lalo o le TAB.

O lau fesili mulimuli, po o tagai le Komiti i tupe foi nei e le o o atu tagata nei e malo e aumai – unclaimed winnings, aua e silafia, a sau le lotto o au e tolu au numera ma le ponesi, e aumai lou malo pe \$5 po o se mea faapena. O le tele lava la o tagata e seasea o e claim mai faailoga laiti ia. O lau fesili la i le Komiti, pe na oo i ai la outou suesuega i le vaega lea, afai foi e fia, o le a se vaega o faatinoina e le Faalapotopotoga lenei i vaega nei o seleni ia e le o o atu tagata e claim mai latou malo i lalo o le vaega lea. E pei o nai manatu ia e faataatia atu i luma o le Komiti ma le Faalapotopotoga, ae toe momoli ai lau faafetai i lenei Faalapotopotoga ona o le fesoasoani i tatou taaloga. Ma le faaloalo lava.

FOFOGA FETALAI: Malo faafetai. Tulai mai le sui usufono mo Gagaemauga Nu.2.

Tofa LEVAOPOLO TALATONU (Gagaemauga Nu.2): Faafetai i lau Afioga i le Fofoga Fetalai ua maua foi so matou avanoa e faaali ai foi nai o matou vaivai laiti. O le tulaga foi o ituaiga mea faapenei, e le taitaiina faaiamatau foi finagalo o isi sui usufono i tulaga o ni finagalo o nisi sui usufono. Na pau le tulaga foi lele i fautuaga e pei ona tuuina mai e le Komiti, faafetai lava i le Afioga i le Taitaifono ma le mamalu o le Komiti. E auai lava se manatu vaivai i fautuaga i le tuufaatasiga lau Afioga i le Fofoga Fetalai, ona ou te manatu i le vaiata lenei ma mea foi e masani ona tatou faalogologo i ai, o le tele ia o feeseeseaiga i lala o mea nei o taaloga a le tatou atunuu. Atonu foi o se fautuaga lenei i le tuufaatasiga e faafaigofie ai tulaga o mea uma nei i le faasoasoina o latou tupe maua mai tupe faameaalofa ma mea faapena. Atonu la e i ai se manatu a tasi se management latou te faasoasoina le tulaga lena, ona ou manatu lea e faigofie lena. Ae moni foi le saunoaga a le Afioga i le Palemia i le tulaga lea o le faafaigofieina o sugatupe a nai loomatutua ma nai toeiina po o aulotu i le faiga o latou bingo ma tulaga faapena. Na pau lava lona, o lea o le a nini atu ai ma petipetiga a pisinisi ma kamupani. E tai pei la foi ona saunoa se tasi o sui usufono i le tulaga lea o kamupani telefoni i a latou petipetiga ia e fai, masalo i sou lava lagona, o i ina e tatau ona palasi tonu ai le faalaiseneina ona o tulaga faapisinisi tulaga na. A o vaega ia o tatou faalapotopotoga sugatupe, o vaega ia e tatau lava ona fai pea le mea lea e agai i ai i le Matagaluega o Leoleo e togi a latou laisene e fesoasoani ai foi i a latou taumafaiga o lo o fai.

O le tulaga la lena o se fautuaga foi i le Taitaifono faapea foi le Afioga i le Palemia ina ia faamanino, e moni o la e ua i ai le tatou Tulafono ua taoto i lagatonu e fai ai fuafuaga o tulaga o petipetiga, a ia faamanino ma faamavaevae mai vaega ia e lua o petipetiga a kamupani ma pisinisi ma vaega ia e i tua i le tatou community e pei ona ou taua.

O le isi vaega i tatou kamupani ia, e matua le misi lava se sekone. E lelei, o le latou lea fuafuaga i le manuia ma le mauaina o se polofiti o latou pisinisi, ae i ai le lagona lau Afioga i le Fofoga Fetalai faapea foi le mamalu o le Maota, ua tataua ona control lelei le vaega lea ma fai lelei se regulation e tau taofiofi ai le vaega lea. O le popolega lea ou te tau tilotilo au agai i ai, tasi lea mea pei ua totoo ai fanau i ato a matua, vaeatu lava le paia o le Maota, ona o suegatupe e taaalo ai i petipetiga ia. E lelei, ae i ai lava le tulaga lena e oo ai fanau i se tulaga le manuia i le mea lea o le tau sue pe tai sefulusene, e tai va i le itula alu atu le isi sefulusene. E pei o nai mea na lau Afioga i le Fofoga Fetalai, na ona faufautua atu, ae le fai ai se lagona. Ma le agaga faafetai.

FOFOGA FETALAI: Malo faafetai saunoa i le sui usufono mamalu. O le a avatu le avanoa i le Afioga i le sui usufono mo Falelatai ma Samatau, ona sosoo ai lea ma le Afioga i le Tuiatua Faanofonofu.

Tulai mai le sui usufono mo Falelatai ma Samatau.

Afioga TAEFU LEMI (Falelatai ma Samatau): Malo faafetai i lau Afioga i le Fofoga Fetalai, faafetai foi usufono i le paia o le Maota. E au foi se taofi e avatu se faamanuiga i o ouluga aso soifua. Ia peitai ona sa faaaogaina mai le igoa o Paulo ina ua faalauiloa mai lou tamai igoa, ia e lelei la le faasao atu o si mea laitiiti lea. E lei tusia e Mose le Tusi Paia, na pau lena o se faasaoga laitiiti e tau ina faataatia atu, na o le lima lava nai Tusi e fesootai ma Mose. E lima nai Tusi amata o le Tusi Paia e fesootai ma Mose, ae lei tusia foi e Mose. Na pau lava le mea e fia faamalalama atili, ona saili mai lea o sou avanoa i lenei itumalo.

FOFOGA FETALAI: Sa i ai se vaega a Mose na tusi i le Tusi Paia le sui usufono mo Falelatai ma Samatau?

Afioga TAEFU LEMI: E leai se mea e tasi.

FOFOGA FETALAI: O le faasaoga lena.

Afioga TAEFU LEMI: Moses is the main character i le uluai Tusi e lima o le Tusi Paia.

Lau Afioga i le Fofoga Fetalai, ua ou le iloa pe aisea le mea e ala ai ona tatou faaaogaina le upu e teena, teena fautuaga. A o lau vaai, o lea e talia fautuaga. Silasila ifo i le fautuaga lona lua a le Komiti; Ia fai ni aiaiga e tuumaioio ai le tapenaga o le faamatuuina o fesoasoani. A lea ua saunoa le Palemia, 30 sikolasipi lea ua faamatuu. E mulimuli faamatuu le 30 sikolasipi, a o aiaiga na faavae ai lena mea, e faataatia muamua. O lou la iloa, o lea e talia le fautuaga lona lua, lea ua i ai le tali lea, aua o le mea moni, e fai le galuega a le Komiti, o le alu atu lava o lea toeaina i le TAB, ia sau ma lana pili. Sa faapena lava le matou maitau, ae faafetai o lea ua talia le fautuaga

lona lua lea, ma ua fai ai le tatou sikolasipi lea. O lona uiga foi, ua maioio ma tuumatamaga le faavasegaina o ia fesoasoani.

Lau Afioga i le Fofoga Fetalai, ua manino lava tiute ma matafaioi tauave a le Malu o le Malo. Ou te le tau tautala i lea vaega ua malama i ulugalua i le silafia a lenei Maota aemaise le faafofogaaga a Samoa, e le tau fai atua foi se tala i le vaega lea. O le mea moni, e oo mai le Tulafono o le Kasino i le Maota lenei, e faavae lava le Kasino ia ma lana ia Pulega, na tatou toe teuteuina mulimuli ma tuu i lalo i le TAB e administer ai le Act lea o le Kasino. O le agaga lava lena o le Komiti i le mataupu lea i le fautuaga muamua, ia toe silasila lelei aua o lea lava ua maioio galuega a le Malu o le Malo.

FOFOGA FETALAI: Malie le sui usufono o lo o saunoa sei tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, pei lava o le vavamamao o sasae ma sisifo, e faapena foi le vavamamao o mea ia e aumai e le sui usufono. E le o tuueseeseina foi le Kasino o lena e vaai e le TAB, a o le isi sui lea o le Komiti lea e saunoa nei.

FOFOGA FETALAI: Tulai mai le sui usufono mamalu e faaauau mai le saunoaga.

Afioga TAEFU LEMI: Faafetai lava i lau Afioga. O le agaga la ia o le Komiti, o le a le mea e le faaoga ai lea vaega ua faavae e le Malo latou te faia laisene, so o se laisene o mea tau taaloga ma mea ia e fesootai ma le vaega lea. O lea foi ou te vaai atu i le Tulafono o Petipetiga, e leai o lea foi e talanoa mai i le charity.

FOFOGA FETALAI: Malie le sui usufono o lo o saunoa sei tuu atu le avanoa i le faauilavea a le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o lea lava e matua talafeagai le TAB ma le faatinoga o latou mea nei e fai nei, lea ua faaopoopo atu i ai ma le Kasino. O lea foi e faatino uma lava mea uma na mananao i ai le Komiti e le faapea o taofia. O le ala lena o lea ou te fai atu ai, o le a le mea o le a toe fai ai iuga i mea o la e lava e fai, o la e lava e fai i le taimi lenei? Ae ou te le iloa pe na outou tilotilo i ai. Masalo ua galo ia outou ona outou tilotilo i le Tulafono. Ai lava ua fai le tou iuga ae le tilotilo i le Tulafono.

Lau Afioga i le Fofoga Fetalai, e pei o le tulaga lena, masalo ua misia ona outou tilotilo i le Tulafono. Ai ana outou tilotilo i le Tulafono, ailoga e sau le 1, 2 ma le 3? E pei o le agaga lena o lea ou te avatua, e le faapea ou te avatua ona o se isi itu, o mea ia e aumai i le agaga o le 1, 2 ma le 3, o lea e faatino. Ai e lei vaavaai le tou Komiti i le Tulafono.

FOFOGA FETALAI: Ia, sei tulai mai le Taitai o le Itu Agai.

Afioga Hon Palusalue Faapo II: Lau Afioga i le Fofoga Fetalai o se mea e fia faasao, ona o le Komiti lea e taua. Na iloilo faatasi le Lipoti ma le Tulafono. O mea ia e saunoa i ai le Palemia faapea o la e faatino i le taimi nei, o lo o i ai la faaletonu ia e avatu i le Komiti, leaga e ese mea e fai i le Matagaluega o Leoleo, ese mea e fai i i, ona o atu lea i tua faaoga laisene la e avatu e sue ai lava a latou tupe, ae pasese mai o mea a Ekalesia.

FOFOGA FETALAI: Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai o le mea e fia faasao. E le o aveesea ai le tiute o leoleo e o latou e tulituliloa. Pe aumai foi i i, ae manatua la, e leai se aufaigaluega a i e pei o leoleo, e tulituliloa. O lona uiga a aumai i i, e toe o lava leoleo e tulituliloa. O lona uiga la, e leai lava se suiga. A o lea e manaia lava o, ana o ane lava le Ekalesia ia i o e totogi pe fia tala e totogi ai le latou bingo po o se latou ponesi, o lea ua masani e o i o, a o i ia, o le faagaioiga. A oo atu nei i le taimi e faatino ai le kasino, masalo po o se faaiuga o se taimi o le tausaga nei e amata ai, ou te le iloa pe toe i ai ni avanoa e toe o ai e fai nai tamai mea ia, aua o le kasino o le mea tele. Ae ala ona agai i ina, ona o le manatu o le mea lea ua le taulia ai pepa o le lotto. E ala ona le taulia le lotto o le lelei o prizes, ae a lelei prizes, ona taulia lea. O le mea lene o le manao ia taulia ia o atu faamalosi tagata e o atu e faatau le lotto. E te fiu lava e faamalosi tagata e o atu e faatau le lotto, ae a le lelei toggi, e le taulia.

O le uiga tonu lene o le mea lea, leaga o lea sa kopi atu ai au i fetusiaig ma ou fautua i ai, sole, se e le o le mea lene e siitia ai a outou tupe, e siitia a outou tupe i le faaleleia o toggi o le lotto ae le o i.

FOFOGA FETALAI: E manatu ua malamalama le mataupu e pei ona i ai felafolafoaiga i lau Afioga i le Taitai o le Malo, aemaise foi o le taumafai mai a le taitai o le Itu Agai, o lea foi ua tali manino le Malo i faiga faavae ma mea o lo o faataatia i lalo o le Tulafono, ae le o aveesea ai le faatauaina o le fautuaga o lo o tuuina mai e le tatou Komiti. Ua tali malamalama lau Afioga i le Palemia o mea uma o lo o i ai ia aiaiga ma atugaluga o le Komiti, ia e leai se mea o see ese o lea lava e faatino mo le taimi nei. E manatu ua malamalama lea mataupu le sui usufono mo Falelatai ma Samatau, see ese i se isi mataupu ae faaauau mai le lauga.

Afioga TAEFU LEMI: Faafetai i lau Afioga i le Fofoga Fetalai. O le Tulafono lava lea o le Petipetiga o la foi e amanaia ai mea o charitable organizations, so e mafai foi ona tatou toe silasila i le Tulafono lea, ae faamatuu mai i ina, pau lava le agaga lea e i ai nei, leaga o lea pei e tau palu faatasi a tatou mea. Ae a faamatuu lava mea tau laisene ia i se authority se tasi, concentrate leoleo i le faiga o le latou matafaioi na ala ai ona faavae, ona pei lava lea ua tuumatamaga ia mea. Manatua foi i le amataga sa faapena lava ona fai, e faaoga mai leoleo e faatinoina lea vaega, aepeitai ua alu alu lava o lea ua tupu le atunuu ma ua tatou matutua foi, ia faaoga lea vaega ua faavae ia faamatuu mai laisene, ae pei ona ou taua o la e i ai le Tulafono lea, le vaega o le charitable e faasino i mea tau le aganuu, mea tau aoga ma mea

faalelotu, ae e le o natia o la e saili seleni ai isi i le vaega lea. Ma lou faaaloalo lava, manuia le Fono.

FOFOGA FETALAI: O la e faafofoga mai le Matagaluega o Leoleo ma e manatu foi e talii foi ae popoe i tulaga o saunoaga ma mea e avatu i le Maota lenei. Ae taua le faaleoina e le Komiti ina ia taatia i le agatonu ma ese ai le atugaluga o lo o tatou i ai, e le o lelei le faatinoina ma o lo o faaaoga e nisi o le aufaipisinisi e agai i ai e faia le tulaga lea o le faaaoga o lalo o le charity, ma non-profitable organisation, o lo o saili seleni i le tulaga e le talafeagai. E ui o lea, o le a taatia atu e faaauau ona tuuina mai ma manino le tali a le tatou Malo pe a tuuina atu e tali mai i le tulaga aloaia le tatou Lipoti. Tulai mai lau Afioga i le sui usufono mamalu mo Faleata Sisifo. Oi malie, sei avatu muamua le avanoa i le Afioga i le Tuiatua ona lafo atu ai lea i lena Itu o le Maota. Tulai mai lau Afioga i le sui usufono mamalu.

Afioga TAFUA MALUELUE TAFUA (Aleipata Itupa i Lalo): Faafetai i lau Afioga i le Fofoga Fetalai, so o se Komiti lava po o so o se Faalapotopotoga a le Malo e tau i ai se agaga foi lea ua le talia pe teena se tofa sa liuliu foi i ai se Komiti po o so o se faalapotopotoga, e i ai lava foi le agaga e tau tetee laititi, ae ui o lea ua ou talia ma le fiafia le saunoaga a le Afioga i le Palemia. Ua ou talia foi ma le fiafia lau tuualalo mai i le matou Komiti e uiga i le tasi lua ma le tolu e teena, ona o le mafuaaga lea o lo o faaauau pea mo le taimi nei. Na ona ou faatepa lava le mamalu o le Fonotaga e tusa ai ma le Tulafono Tumau e 170, e tusa ai ma aiaiga o le Tulafono lea e faapea, o le a avea ma tiute o le Komiti o Tupe Maua ma Tupe Totogi, (a), iloiloa o so o se Tulafono Tau Faaofi talosaga po o so o se isi mataupu ua tuuina atu i ai e le Fono Aoao e tusa ai o Tulafono Tumau ma Tala Faatatau o Tupe po o le toe iloiloa o le faatinoina o galuega a Matagaluega. I lalo lava o le Tulafono Tumau 170 (d), tuuina atu o fautuaga i le Fono Aoao i so o se fesuiaiga e ono fuafuaina ua manaomia le Tala Faatatau o Tupe Faaletausaga. E pei na ona ou faatepa le mamalu o le Palemene i le vaega lea o le Tulafono Tumau, atonu e ala ai foi se tuualalo na avatu e le matou Komiti. E ese la sou taofi e pei ona faaalua e nisi o sui usufono ua mavae, ou te lagolagoina malosi le saunoaga a le Palemia le upu lea o le.....ona talu ai o ia sa nofo i le Tulafono lea o le Conscious Vote e faapea i lou faaliliuga o le vaega lea o le loto fuatiaifo, e fai ai le palota lea, a o lea foi sa saunoa le Afioga i le Palemia i le common sense po o le faautautaga tataua lea. A o le mea lea ou te tuualalo atu ai i lau Afioga i le Palemia le Taitai o le tatou Malo ma le mamalu o le Malo, e tataua foi ona silasila i le mea foi lele o le tofa fetuutuunai, aua e pei o le lelei ona faatinoina o le matou tuualalo na avatu ou te talia. Ae pau lava le mea lea ou te tulai atu ai ma le agaga faaaloalo, muamua e faamanuia i lou aso fanau lau Afioga i le Fofoga Fetalai faapea foi le Afioga i le Palemia. E faapitoaugafa sau tala e uiga i lou tulai atu, ona o lea ua talia le vaega 4 o le matou Lipoti lea e faapea mai. Ia mataitu pea le Pulega ma le Komiti Faafae o Petipetiga nisi auala mo le faafaigaluegaina ai o tupe a le Pulega mo nisi tupe faasili, aua le siitia ai ma le faaleleia o atinae tau taaloga i totonu o le atunuu. Ae ou te fia faaopoopo la i le vaega lea e 4, pe a tusa ai ma le finagalo o lau Afioga i le Fofoga o le Fono, ia faaopoopo i ai le vaega lea, ia silasila totoa le Malo i le tuualalo ua avatu e le Komiti lea e i ai le fautuaga i lalo i le 1, 2 ma le 3. O le faaopoopo lea ma le faaaloalo i lau Afioga. E faatu

atu ai se manatu na ona silasila totoa i ai o le Malo ae le o faapea o fai atu e fai i ai se latou faaiuga, a ia latou amanaia le matou tuualalo e pei ona tuuina atu le fautuaga. Ma le faaaloalo.

FOFOGA FETALAI: Na outou faafofoga i le tatou Fono lea na tea nei, na matua tulai mai lava le Taitai o le Itu Agai e faaaliali mai o le mea e tatau ona ave i ai le faamuamua a le tatou Malo, na o le Komiti o Tupe. O lona uiga o le taua lena o la outou Komiti o le Komiti o Tupe. A talanoa loa le Komiti o Tupe, e ave le faamuamua i mea uma lava tatou te atugalua ai. O lea foi ua e saunoa manino e ala i le tatou Tulafono 170, e sao ma agatonu le faamoemoe i le faatulagaina mai e maioio ai galuega a la outou Komiti leaga o la outou Komiti e mafai ona take over i so o se mataupu lava ua tuai ai nisi Komiti Faa-Palemene. E mafai ona outou tauaveina tiute ia, a o lea ua manino le saunoaga a le Palemia e le o se teena o lo outou finagalo, a o le 1, 2, 3 o lea tatou te faia i le taimi lenei, o mea na o lea tatou te faagaioioia ma o lea e activate tulaga na e pei ona tuu mai ai a outou fautuaga ma mea uma, e le faapea e le o faatinoina e le Malo le TAB ma le Faalapotopotoga o Petipetiga, o lea e faatulaga.

O lea foi ua talia ma le atoatoa o le a silasila i ai i le tulaga mo le lumanai ina ia taatia i lagatonu le faafoega, ia aua ne i laaloa pe silasila faatauvaa a o lea ua toe saunoa mai e silasila mamao. Lau Afioga i le sui o le tatou Komiti, e faigata ona ou toe fai atu ne i e toe faaopoopo la outou silasila mamao po o lo outou toe silasila i luga o la outou Lipoti, o lea ua sainsi le Taitaifono o la outou Komiti. O a lava la faaupuga ua i ai, ia finagalo malie le sui usufono mo Aleipata Itupa i Lalo, e le mafai ona toe fai ni faaopoopoga i la outou Lipoti i luga ona o lea ua talanoa le tatou Palemene i luga o la outou Lipoti, o a nisi silasila mamao pe silasila totoa, o lea lava ua lava taoso le faamatalaga ua tuuina mai i la outou Lipoti e talanoaina ai.

Tulai mai le sui usufono mo Faleata Sisifo.

Tofa LEALAILEPULE RIMONI AIAFI: E leai se manatu e toe faaumi le talanoaga o lenei Lipoti. E pau le mea lea ou te fia faaopoopo ai, afai o lea ua saunoa le Afioga i le Palemia e talia ma le atoatoa le 4, e le mafai ona talia le 4 pe a le talia le 1, 2 ma le 3, aua e pei o i ina e auala atu ai le fautuaga mulimuli. O le fautuaga muamua lau Afioga, o le fautuaga na omai ma le Taitaifono o le TAB o le finagalo o le TAB ia tuufaatasi ia Tulafono e lua, o lea la na avatu....

FOFOGA FETALAI: Malie le sui usufono, sei avatu le....

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, e vaivai tele le mea lea e tulai mai ai le sui usufono lea na tulai mai nei, e i ai le upu lena o lo o i ai, o le sapelaina o le upu, o le n i s i nisi, ina ia mataitu pea e le Pulega ma le Komiti Faafoe o Petipetiga nisi auala e ese ai ma le 1, 2 ma le 3, ua e maua mai? O le faalavelave e te lei aoga i le Pi Tautau.

Lau Afioga i le Fofoga Fetalai, o lea e manino lava le... o le ala lena na ou lou tulai atu e matua faamamafa le 4, nisi auala e ese ai. O le toe faatepa lava i le 3 mo sina faataitaiga; ave le faamuamua a le Pulega ma le Komiti Faafoe i atinae tau taaloga e pei o le sini autu na faavae e le Malo le Komiti Faafoe o

Petipetiga. |Ia sei vaai i ai i lena mea, o lea lava ou te fai atu au e ana...o le a tauau ina nanu Tulai ae nofonofo le palagi. O au e ana le Tulafono Autu, o mea uma lava ia na aumai, e faamuamua uma lava mea, e leai lava se mea e faamuamua le isi mea ae aua le faamuamua ina le isi mea. A o le mea lea ua outou aumaia, ia ave le faamuamua na o taaloga a o isi mea ia ama i ai, o le faaupuga lena. O lea ou te fai atu ai, o lea e tutusa uma lava le faiga o mea uma ae faavae i luga o le uta fetalai a le Komiti. E leai lava se mea o faaopopo pe toesea, o lona uiga tatou agai pea i le mea lea e i ai nei o lea lava e lelei. E le faapea e i ai se atoatoa po o le agai agai i luma ona toe tilotilo foi lea i ai, aua afai nei e fai le palota talia le mea lea tou te fai mai ai ae o lea e ia te au e lē talafeagai, o lona uiga e uma lava le 90 aso e leai se galuega e faia.

Lau Afioga i le Fofoga Fetalai o lea tatou te talanoa, e le faapea e faia nei iuga ona avatu lea faataatia i le ea, e fai iuga ae tatau ona faatino e le Kapeneta, ae o lea ua ou avatua ia le tulaga o le Tulafono lenei e tatau ona tele i ai sau tautalaga, leaga o au e ana le Tulafono i le taimi na pasia ai ma ou te malamalama lelei i le faataua uma o mea ia, e leai se mea e muamua a o lea ua outou fai mai nei o taaloga na ave i ai le faamumua, o lea ou te leai atu, e ave le faamuamua i mea uma lava ia e lisi i lalo o le tatou Tulafono.

Tofa Levaopolo Talatonu: Lau Afioga i le Fofoga Fetalai....

FOFOGA FETALAI: Tulai maia. O le a se mea le sui usufono mo Gagaemauga Nu 2?

Tofa Levaopolo Talatonu: O se mea e fia faamalamalama ma fia manino ai ona o lea e tulai mai foi le sui usufono mamalu o ia o le sui o le Komiti. Ae masalo o lalo o le Tulafono Tumau 145, o fautuaga ma lipoti e aumai i totonu o le Maota lenei e fai i lalo o le finagalo o le Komiti, a o lea e tau maua atu e pei o fautuaga e aumai i tua i Matagaluega lea e fau mai ai le finagalo o le Komiti pei e le talafeagai lea tulaga.

FOFOGA FETALAI: Malie la le sui usufono mo Faleata Sisifo, sei tuu atu le avanoa i le Taitaifono leaga o lea ua...Na e saunoa i le tulaga lea e taumafai mai le sui usufono mo Gagaemauga Nu. 2 e faamalamalama. Sei tulai mai le Taitaifono.

Susuga Hon Papaliitele Niko Lee Hang: Lau Afioga i le Fofoga Fetalai, e tulai atu ma le faaaloalo na o se mea e fia faasao i le saunoaga lea na mavae atu nei. E le i faavaeina le faaiuga a le Komiti i se fautuaga mai le Pule Sili, atonu na fesoasoani le fautuaga lea i le faaiuga na fai, a o le faaiuga na fai lava e le Komiti. Ma lou faaaloalo lava.

Tofa Levaopolo Talatonu: Lau Afioga i le Fofoga Fetalai, na mafua ona ou tulai atu, ona o lea faatoa uma nei lava ona saunoa le sui usufono o Faleata Sisifo, o le fautuaga lenei o le fautuaga mai le Komiti a le Pulega lea na...Pei o le mea lea na ou tulai atu ai ma le agaga faaaloalo.

FOFOGA FETALAI. Tulai mai lau Afioga i le Palemia.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, ou te tulai atu ou te matua ou lagolagoina le Taitaifono, Susuga Papalii, e sao lelei le mea lea e saunoa i ai le Taitaifono.

FOFOGA FETALAI: Tulai mai le sui usufono mo Faleata Sisifo.

Tofa LEALAILEPULE RIMONI AIAFI: Lau Afioga, o lea e manino lava o tatou e faavaea Tulafono, saunoa le Palemia o ia e faavaea ona ave lea faaliliu e le isi vaega, ona uma lea ave administer e isi tagata foi ia e faafoe e latou Tulafono. Mai la i vaega nei e tolu, o lea e i ai faafitauli ia e i ai nei. O le taimi la e faafoe ai le Tulafono, o i ina la e i ai le avanoa foi lea e toe foi mai ma ni fautuaga i mea e matimati ai e toe faaleleia atili ai le Tulafono. O lea la e i ai mafuaaga ia na avatu ai le lagolago a le Komiti i le tagai a i latou o faafoea Tulafono, e ao ona tuufaatasi Tulafono nei e lua, o i ina e atili ai ona malosi ma maua ai nisi vaegatupe faaopoopo e fesoasoani i le latou galuega. O lea la na aumai ai e le Komiti e ave le latou lagolago i ai, ia faaleleia atili le Tulafono e lei atoatoa ona fau e le Palemia i lona foi taimi.

Ia ona oo mai lea i le vaega lua, ia e faapea mai e aumai le lisi o donation foi ia o meaalofa, o au na ou toe fesili i lau Afioga, o lea ou te vaai atu i le tou meaalofa, e pei e le ogatusa. A ou vaai atu foi i ai, a omai le au netball i i, ave i ai, omai le au netball i i, a uma foi omai le national body ave foi i ai. E leai sa outou faiga faavae foi lea vaevae faapea foi lele ia iloagofie a omai faapea, ia o lea o le a ave i i ma i aua e eseese foi tupe, ia ona fai mai lea, ia o lea o le a fai.

FOFOGA FETALAI: Ia malie le sui usufono, sei tuu atu le avanoa i le faauilavea.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, sa i ai Lipoti sa aumai muamua. Sa fai tufatufaga i le tausaga, a maea le tausaga ona fai lea o le faasoava ave i lea faalapotopotoga, ave i lea faalapotopotoga, sa faapena ona fai. Ona sau, sau lea ua i ai le suiga ona o le mea ua tulai mai, e pei e foliga mai foi lele e tiga lava ona le moomia, ae talu ai o faiga la ia e tatau ona i ai ni faiga e faalaugatasia, ia ona ave ai lea i se faalapotopotoga ae latou te le o moomia. O le ala lea na toe fetuunai ai le faiga a le Komiti i le tulaga la lea, ina ia fuafua ia i latou o lo o aupito sili ona moomia. E oo foi la i tulaga tau taaloga, a oo foi i taaloga, e i ai taaloga e matua moomia lava ia le seleni. Ona aumai foi lea o le latou talosaga tilotilo i ai ia le tatou Faalapotopotoga. O lea ou te malamalama lelei i le mea lona e tou te fai mai ai, ia matua taoto lelei le faavae ina ia faatutusa uma tagata uma. Ae le faapena le tulaga o i ai ia le real life, a, e le faapea o le a te i a faasoava tutusa taaloga ona avatu lava lea o seleni i le isi Faalapotopotoga ae sue ae, ua leva lava ona de-register. O lea foi la ua i ai le faiga faavae lea e i ai i le taimi lenei a le Ofisa o Aoga e tali ai le mea lea sa saunoa mai i ai se tasi o sui usufono, e ave ai ia fesoasoani i Faalapotopotoga e fesoasoani ai la i le vaega lea sa laga le faagaoioiga, e sao lelei le sui usufono, ina ia i ai ni seleni e ave i Faalapotopotoga ia e faagaoioi ai taaloga. I le taimi lenei e tolu vaega o lo o alu atu ai le fesoasoani, a alu atu i totonu o le Malo i lalo o le Matagaluega o Taaloga ma Aoga, e alu atu ai la

le isi fesoasoani i ina. E alu atu le isi fesoasoani i lalo o le faiga la lea e auala mai i le TAB, e alu atu le isi fesoasoani i lalo o le SASNOC, a o le faalavelave la o le SASNOC ua tau leai ni tupe a le SASNOC talu ai faalavelave ia na faafeagai ma le SASNOC. A o le tele lava la o fesoasoani ia e ave i tulaga tau taaloga o lea e sau sao mai lava i o i le Vote Item a le Matagaluega o Aoga ma Taaloga. A alu alu la ua faaletonu ae ua vaai le Malo, o se mea e tatau ona fai, ia ona alu loa lea i lalo o tupe le fuafuaina, ona fa ai lea i ina o fesoasoani e fai.

Lau Afioga i le Fofoga Fetalai, o lea e tele lava le tofa fetuunai i le Kapeneta e mafai ai ona fai fesoasoani i ē o moomia, ou te malamalama i le mea lea tou te fai mai ai ina ia faatutusa, ae le mafai ona tutusa le lalolagi lenei, e i ai lava mea maupuepue, e i ai foi mea vanuvanu, e i ai foi eleele e talalao. E faapena foi lo tatou olaga o lo o i ai, e i ai Faalapotopotoga o la e moomia le fesoasoani, e i ai Faalapotopotoga e le moomia se fesoasoani, ia ona fetuutuunai ai lea faapena.

Lau Afioga i le Fofoga Fetalai, o le ala lena o lea e i ai ia faaupuga foi lele, ‘consider and application on its own merits,’ e vaai lava i le tusi talosaga i itu taua e moomia ona faatino ai lea e faapena ona fetuunai ai ia le tofa fetala’i.

FOFOGA FETALAI: Malo. Tulai mai le sui usufono mamalu e faaauau le saunoaga.

Tofa Lealailepule Rimoni Aiafi: Ia malo faafetai, o lea ua saunoa le Afioga i le Palemia e lagolaga le Taitaifono, ia ua lava foi lea, faafetai.

FOFOGA FETALAI: Malo, ia tulai mai le sui usufono mo Aana Alofi Nu. 3.

Afioga TOEOLESULUSULU CEDRIC POSE SALESA SCHUSTER (Aana Alofi Nu. 3): Faafetai i lau Afioga i le Fofoga Fetalai, e tasi lava se fesili faamolemole lau Afioga i le Fofoga Fetalai. Ona e maitau atu o lea o lo o faafoeina o le Komiti Faafoe o lo o faapea ona feagai ma le vaaiga o lenei TAB, ua silia ma le 20 tausaga pe a ua leva ona i ai, e maitauina foi o lo o faapea ona faatinoina i se isi o kamupani i tua i le suesuega a le tatou Komiti, po o i ai se fuafuaga mo aso o i luma ina ia faatuina ma puleaina lava e lenei Faalapotopotoga le faatinoina o ana galuega? E faafetai ai foi lenei kamupani o lo o faapea sa feagai i tausaga ua mavae ma o lo o feagai pea ma i latou le vaaiga o lenei Pulega, ae i ai le talitonuga, afai ua 20 tausaga atonu ua tele se tomai foi ua mafai ona build up i totonu o le Faalapotopotoga ina ia mafai ona faatino ai, atonu foi o le isi vaega lea e mafai ona faateleina ai seleni, pe afai e lava i latou e full time ma le Board e faatinoina, faafetai.

FOFOGA FETALAI: Ia tulai maia lau Afioga i le Taitaifono e fai lau tali faaiu ona tuuina atu loa lea o le tatou fesili.

Susuga Hon PAPALIITELE NIKO LEE HANG: Lau Afioga i le Fofoga Fetalai, e le tele foi ni mataupu o lo o faamauina i i ou te toe tali atu ai, ona e talitonu ua malamalama ia mataupu sa lagalaga ai finagalo o sui usufono mamalu ona o le fesoasoani mai foi o le Afioga i le Palemia o ia e ona Tulafono. Na o le pau lava lau Afioga, o fesili ia mai sui usufono mamalu

mai mea ia a le Digicel ma le SamoaTel, e faamalulu atu i le sui usufono mamalu, masalo sei tuu atu pea le avanoa i le Afioga i le Minisita o lo o vaai lenei Faalapotopotoga i le tulaga lea, aua o lea e le o po se lilo i le tulaga lea i le faaogaina foi o nei kamupani i mea ia o text to spin ma mea faapena, ia ae le o malamalama ai foi la ona e le i alu i ai se sailiiliga a le matou Komiti i le tulaga lea. Ia o mea tau faamanuiaga lea na afea i le lauga a le sui usufono mo Gagaemauga Nu. 2, o lo o tumau lava le tulaga lea. A manino lava le talosaga mo se laisene i ni charities, ia e le taofia le tulaga lea. Pau lava le mea lea ona o mea o faafitauli ia na aliali mai i le matou sutesuga mai le alii pule o lenei Faalapotopotoga, o le tulaga lea o le lē faatinoina lelei o fuafuaga lea i lalo i le tuuina atu o laisene i Faalapotopotoga, pei la o le mea aupito i ogaoga lava lea na faaalua e le alii pule, o le tulaga lea e talosaga mo ni pemitā, ae o saili tupe ai for their own interest, ae le o mafai ona faaogaina for charity purposes. O le tulaga lena lea na mafua ai ona tuuina mai le matou fautuaga muamua ona o le talitonuga foi o le matou Komiti, ia o le Gaming Act o le 1978, o le TAB Act o le 1990, ua fai sina leva o nei Tulafono, a o tulaga i le aliai mai ua i ai faafitauli. Pei o le agaga lava lena na tuuina mai ai le fautuaga lea, a faapea la ua le talia e le Malo le tuufaatasia, ae toe silasila totoa la i le faatinoina o nei Tulafono, po o talafeagai ma ala o le Tulafono.

O le isi.....

Tofa Levaopolo Talatonu: Lau Afioga i le Fofoga Fetalai, faamolemole lava na o sina mea lava lea.....

FOFOGA FETALAI: Sei tulai mai le sui usufono mamalu.

Tofa Levaopolo Talatonu: E lei maua lelei mai e le Afioga i le Taitaifono ia le uiga o lau faamatalaga. Lei e lei i ai se tulaga foi ia o ni faamanuiaga, na o le pau lava le tulaga lea sa ou tulai atu ai, o mea ia o text to spin ma mea foi ia e fai i luga o telefoni, o petipetiga, e faapena foi la i mea o bingo ma mea ia o petipetiga foi. Na pau la le mea lea na tau popole agai i ai sou manatu, ona o lea ua o faatasi le lua lea, e tasi le latou fee e totogi i leoleo, e tutusa foi. A o le eseese la, e ese lava taumafaiga o suga tupe a nai loomatutua i ni a latou bingo, e le o se pisinisi, a o kamupani ia, ia o pisinisi o la e maua le latou polofiti. Pei o le eseese lea na ou fai atu ai, e tatau la ona laisene lelei ia kamupani ma pisinisi, ia ae agai pea ia tatou faiga bingo i le Ofisa o Leoleo e totogi ai a latou tai \$6.00. Ma le agaga faaaloalo.

FOFOGA FETALAI: Ia tulai mai le sui usufono mamalu e faaauau le tali atu.

Susuga Hon PAPALIITELE NIKO LEE HANG: Ia faafetai o lea ua toe malamalama atu i le fesili a le Afioga i le sui usufono mamalu. Ma ou te talitonu ia o le a tuu atu pea i le Afioga i le Minisita le tulaga lea, ona o lea la i le maitau foi i le saunoaga a le sui usufono mamalu faapea o la e le o faaogaina e pemitā nei ia taumafaiga foi a loomatutua i a latou bingo, o la lava e maua le avanoa i le tulaga lea. Ae saolele lava le saunoaga a le sui usufono mamalu, ona o le Digicel ma le SamoaTel, ia o pisinisi, e tatau la ona toe silasila i ai la, po o le a le tulaga o ave ai laisene nei, aua e tatau ona alu la i lalo o le TAB pe a faapea e, a faapea o fai e leoleo, ia o lou talitonuga, e le

sao lea tulaga ona o le pisinisi. Ia ma le tulaga la lea ona e saunoa le Afioga i le Palemia ma taua au sa ou Minisita i le vaega lea, ia o Lipoti e talanoa o le 2011 ma le 2012, ne i meaane ua faapea foi nisi o faaletonu ni au mea na fai i nei...a o le Afioga ia Faumuina lea e Minisita i le vaitau lea. Ma lou faaaloalo lava.

FOFOGA FETALAI: Sei tulai mai le Afioga i le Palemia.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, leai o lou taua o Papalii, o lea sa manino lava lau talanoa atu, o le tagata e malamalama i mataupu ia e aumai, e le o se tulaga...o le ala foi lena o lea sa ou avatu ai lau faafetai i le taua o le Lipoti lea na aumai, o Papalii o ia lea sa ia faafoea ia mea nei, o lea foi la e saunoa mai ma le malamalama. Ae o le itu lava lea i petipetiga, masalo o le mea tonu lea e tatau ona i lalo o le vaega lea a le TAB mea ia o petipetiga a le SamoaTel, ma e le faataga ai ni faiga pisinisi i lalo o le Tulafono i tulaga ia. A o mataupu na o le a taatia mai ia te au ma le Minisita, sei toe follow up le vaega lea, aua o mea na ua leva ona tatau ona vaai i ai ia le TAB. A o le tulaga ia i le vaaiga a leoleo, lau Afioga i le Fofoga Fetalai, o lea sa ou faasalalau maia ia le tulaga o le Lipoti o le Komisi Suesue e faasaga i Leoleo, o lea ua maea, ua uma foi ona fai i ai le faaiuga a le Kapeneta, ma o le isi lea vaega lea na agai i ai ia Lipoti, o mea lava nei o le faatinoga o tiute. I le tulaga la i le tuliloaina o latou nei, pei lava ona ou fai atu, o mea ia e tatau ona silasila i ai Leoleo, ina ia faatino ia amiotonu le latou faatinoga, pe see mai foi la i i, ae toe iu lava i Leoleo le vaaiga o mea nei. O le ala la lena o lea e taua ai foi manatu ua faatulai mai, ae ua fetau tonu foi ma le faaiuga a le Kapeneta ua taoto mo le toe faamalosi o le vaega o le falepuipui ua tuueseeseina nei, pei ona aumai ai le Tulafono i le tausaga talu ai, ia ma le tulaga foi o le general police, vaaiga i le tulaga aoao o galuega faa-Leoleo i le vaaiga o le Tulafono. A o le tulaga lena lau Afioga e le o se agaga foi lea e fultua i le galuega a le Komiti, e taua lava le fautuaga lea e aumai i le 4, a o le 1, 2 ma le 3, o la lava e faatino e tau mai i le taimi lenei. Pau lava le mea ou te tau popole ai, a alu atu nei le 3 lea, ia o lona uiga ua oti uma isi mea ae ave le faataua i i taaloga, a o lea lava e faataua tutusa i le vaaiga i faiga faavae a le tatou TAB. O le ala foi lena o lea e tumau ai pea le taofi, tatou alu e ave le 4, o le fautuaga taua tele le 4 lenei, a lelei ona faatino le 4 e leai se mea e toe popole ai i le 3, 2 ma le 1.

Lau Afioga i le Fofoga Fetalai, o le mea aupito taua lena ae o lena ua faatu atu le lafo, *Tatou pasia le 4.*

FOFOGA FETALAI: E i ai se isi mataupu lau Afioga i le Taitaifono o le a tuuina atu le tatou fesili?

Susuga Hon PAPALIITELE NIKO LEE HANG: E leai lau Afioga, e pau le mea ua talia foi le fautuaga ma le faanoanoa tele, faafetai.

Na faamaonia le Lipoti.

Susuga Hon Tuilaepa Fatialofa Lupesoliai Aiono Neiote Sailele Malielegaoi: Lau Afioga i le Fofoga Fetalai, ina ia malamalama o lea ua talia le fa. O le faafesili atu lena lau Afioga i le Fofoga Fetalai.

FOFOGA FETALAI: E pei lava o a tatou tu ma aga masani lau Afioga i le Palemia, o a tatou felafolafoaiga ia e fai nei o le tali aloaia ma le faatinoina o le faaiuga a le Malo e tuuina mai i totonu o le 90 aso. O le tali e faapepaina mai e le Malo i tali aloaia, o le tali lava e tali mai ai le Malo o le tali lena a le Malo. O luga atu lena o le faatinoga o a tatou galuega, a o le taliaina o a tatou Lipoti e aofia ai tuleiga ma saunoaga, o lea ua i ai lau faamalamalama i luga o le taliaina o vaega o le Lipoti ma vaega e le o talia, o le tali aloaia o le a tuuina mai e le Malo i totonu o lana Tali Tusitusia i totonu o le 90 aso.

E tusa ai ma le Tulafono Tumau 54, e ao i le Malo ona tuuina mai i le Fono Aoa se Pepa e tali atu ai i Fautuaga na tuuina atu i le Malo mai le Lipoti a le Komiti Filifilia ia le silia le 90 aso talu ona faamaonia e le Fono Aoa le Lipoti.

P.P.2013/2014 NU.88, LIPOTI A LE KOMITI O TUPE MAUA MA TUPE TOTOGI I LE P.P.2013/2014 NU.21, LIPOTI FAALETAUSAGA A LE FAALAPOTOPOTOGA INISIUA TAU SOIFUA A SAMOA MO LE TAUSAGA FAALETUPE 2011/2012 - ILOILOGA

Susuga Hon PAPALIITELE NIKO LEE HANG: Lau Afioga i le Fofoga Fetalai ua ou tulai atu ma le agaga faaaloalo ou te faatu le lafo, *Ina ia faautagia e lenei Fono Aoa le Lipoti a le Komiti o lo o tuuina atu ai ana Sailiiliga, Fautuaga ma Iugafono.*

Faaluaina e se tasi o sui usufono mo Faasaleleaga Nu.1, Afioga Hon Gatoloaifaana Amataga Alesana Gidlow, le sui usufono mo Sagaga le Usoga ma le sui usufono mo Aleipata Itupa i Lalo.

Susuga Hon PAPALIITELE NIKO LEE HANG: Lau Afioga i le Fofoga Fetalai.

“FAUTUAGA.

I le maea ai o Iloiloga a le Komiti na faaiugafonoina ai e fautuaina le Malo:-

- 1. Ia faatinoina ma uunaia malosi polokalame faalauiloa a le Faalapotopotoga e faalauiloa ai i le atunuu lautele le taua o le faia o Inisiua Tau Soifua, ma faamanuiaga eseese e agavaa i ai Sui Faisaofaga.**
- 2. Ia faailoa ma uunaia malosi e le Faalapotopotoga o Inisiua Tau Soifua a Samoa i le atunuu lautele le taua o le tausisia ma faatumauina le teuina pea o a latou saofaga tau inisiua seia aulia tausaga faatapulaaina e matua ai (mature). E manatu le Komiti e ao ona faatauaina lea tulaga ina ia agavaa**

ai le aufai inisiua i faamanuiaga tau seleni ma ponesi e maua i le vaijami e matua ai a latou saofaga.

3. Ia tulituliloa ma faasalalau faalauaitale i le atunuu atoa ma atunuu i fafo, suafa o i latou o lo o i ai pea i le Faalapotopotoga a latou saofaga po o inisiua tau soifua ua matutua ae le'i talaina i tua.
4. Ia soalaupuleina e le Pulega ma le Komiti Faafoe nisi auala mo le faalauteleina atu o lana auaunaga i le faatinoina o isi inisiua e ese mai i inisiua tau soifua e pei ona faatinoina e le Faalapotopotoga i le taimi nei.
5. Ia silasila le Pulega ma le Komiti Faafoe mo le toe iloiloina o pasene o tului (interest) o lo o faaee atu i luga o nonogatupe laiti o lo o agavaa i ai le aufai saofaga.

IUGAFONO.

I le maea ai o Saililiga a le Komiti na faaiugafonoina ai e fautuaina le Fono Aoao:-

Ina ia faamaonia le P.P.2013/2014 Nu.21, Lipoti Faaletausaga a le Faalapotopotoga Inisiua Tau Soifua a Samoa mo le Tausaga Faaletupe Faaiuina aso 30 Iuni 2012.”

FOFOGA FETALAI: Malo faafetai mo le saunoaga malamalama a lau Afioga i le Taitaifono. Ua avanoa lo tatou Maota mo felafolafoaiga.

Tulai mai le sui usufono mo Faasaleleaga Nu.2.

Susuga PAPANII LIO FAAVAIVAIOMANU TAEU MASIPAU:

Faafetai lava i lau Afioga i le Fofoga Fetalai, e faafetai foi i le faafofogaaga a le paia o le Maota. E faafetai i lau Afioga i le Taitaifono o le Komiti mo Fautuaga ma Iugafono e pei ona tuuina mai i luga o le Laulau a Fono.

O lou lava sui usufono e fia momoli le faafetai i leni Faalapotopotoga. A vaavaai i Lipoti mai leni Faalapotopotoga o Inisiua Tau Soifua o le atunuu, e ese le manaia, lelei le faavae ma lelei fuafua leni Faalapotopotoga. A silasila foi lau Afioga i le Fofoga Fetalai ma le paia o le Maota i le Lipoti lea e loma nei a le Pule ma Suetusi Sili, o le tasi leni Faalapotopotoga latou te le o solia le Tulafono foi lea o le Pulega o Tupe a le Malo i le Vaega 13, le Faalapotopotoga lea o Inisiua. O le agaga lena e momoli ai le faafetai tele i le Pulega ma le Faalapotopotoga ona o le usitaia aemaise lava le Tulafono o Pulega o Tupe a le Malo, faafetai i le Pulega ma leni Faalapotopotoga i galuega lelei aua le agai i luma.

O lea foi e matau atu i le Lipoti e tele lava a latou polofiti po o tupe faasaoina ma e momoli atu ai le agaga faafetai. O le Fautuaga muamua lau Afioga i le Taitaifono ma le Komiti e taua tele i lau vaavaai i ai i auala e faalauiloa ai ma ia uunaia malosi polokalame ina ia faatosina ai le mamalu o le atunuu ina ia auai i leni Faalapotopotoga o Inisiua Tau Soifua.

O le fesili a lenei sui usufono lau Afioga i le Taitaifono ona o lea foi e faafofoga mai le Malo ma le Kapeneta. E mamafa i le mafaufau o lenei sui usufono ni inisiua a le Matagaluega o Leoleo po o gafea o nei mea e faaono fesoasoani ai. Aua o le mea moni lava, o le tasi lenei mataupu e ese le leva ona talanoaina. Ou te le iloa pe ua faatino i lenei taimi, aua e pei ona saunoa le Palemia ma nisi o sui usufono, o leoleo, o leoleo, o leoleo lava i taimi uma ma mea uma, a o le agaga o lou sui usufono po o le a ea se taimi o le a silasila ai i ni inisiua o leoleo i a latou galuega o lo o faatino? E le tau faailoa atua le fitaituga ma le gapatia o Malu o le Malo aua le saogalemu o le atunuu.

E pei o le agaga lena o lea e avatu ai ona o se fesoasoani mo le Matagaluega o Leoleo.

FOFOGA FETALAI: Malie le sui usufono o lo o saunoa, sei tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Ou te tulai atu e faamalie i le sui usufono sa leoleo. Malie ia e le o se Lipoti a Leoleo lea e talanoa, a o le Lipoti a le Faalapotopotoga o Inisiua. Ou te lagona o la ua faalogologo mai Leoleo i lou alofa ia latou, ae sese le taimi lea e fai ai. Se i oo ia i le taimi e talanoa ai le Lipoti a le Matagaluega a Leoleo, ona e laga mai ai lea o le mataupu lena, a o le mataupu lea tatou te talanoaina o le mataupu i inisiua lautele o o tatou tagata. E pei o le tuualalo atu lena ona ua galo i le alii faipule o ia o le faipule e le o toe leoleo.

Susuga PAPALII LIO FAAVAIVAIOMANU TAEU MASIPAU: Faafetai, e leai o le uiga lava ia o le Lipoti o le inisiua tau soifua. E aafia ai foi ma Leoleo, e faapea ea o Leoleo o a igoa; o le lipoti tau soifua i a latou galuega. E pei o le agaga tonu lena, ae aoga le lagalaga atu ina ia toe silasila i ai lau Afioga i le Palemia, le Kapeneta ma le Malo.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Na ona ou tulai atu e faasao leaga o lea ua faapio, faapio mai lava agai mai i Leoleo, ae e tatau ona e saunoa faalauaitetele ae aua e te manatu faapito. O lea ua e manatu faapito tele, faalauaitetele lou finagalo ae sei oo i le taimi o le Lipoti a le Matagaluega o Leoleo ona tatou toe talanoaina lea o le mataupu.

Afioga Hon Palusalua Faapo II: Lau Afioga i le Fofoga Fetalai, na o sina mea e fia faamalamalama.

FOFOGA FETALAI: Ia, o le a le mea e fia faamalamalama?

Afioga Hon Palusalua Faapo II: O le faigofie ia, afai e le i faia tau mai e le i faia leaga e taua le mataupu lea e laga. O soifua o Leoleo, afai e leai se mea o faia, tatou agai i luma.

FOFOGA FETALAI: Se i tatou talanoaina le mataupu i Leoleo ona faasagatonu ai lea o le mataupu lea.

Susuga Hon Tuilaepa Fatialofa Lupesoliai Aiono Neioti Sailele Malielegaoi: O le mea lena o lea ou te tulai atu ai aua ona pau lava le faamuamua a le Faalapotopotoga o Inisiua, o le inisiua o tagata lautele ae e le faapitoa i se vaega, ae se i oo tonu mai lava le mataupu tau leoleo ona aua loa lea ne i toe tuua, pe valu aso o talanoa, talanoa ai pea, ae leaga e le o se mataupu tau leoleo le mea lea, o le Lipoti a le Kamupani Inisiua.

Susuga Hon Papaliitele Niko Lee Hang: Lau Afioga i le Fofoga Fetalai.....

FOFOGA FETALAI: Ia, se i tulai mai le Afioga i le Taitaifono o le Komiti o Tupe Maua ma Tupe Totogi.

Susuga Hon Papaliitele Niko Lee Hang: Lau Afioga i le Fofoga Fetalai, ma le faaaloalo na ona ou fia fesoasoani atu i le Taitai o le Itu Agai ona o le matou Lipoti lea e talanoa. E tatau foi ona malamalama e le o se Lipoti a Leoleo a o le Lipoti a le Faalapotopotoga o Inisiua.
Ma lou faaaloalo lava.

FOFOGA FETALAI: Tulai mai le sui usufono mamalu.

Susuga PAPALII LIO FAAVAIVAIOMANU TAEU MASIPAU: Ioe, ua taua foi lou lagalaga atua ona o lea o le a le faapitoa i lalo a o le a faapito i luga, ae faafetai. Ona pau lava lea o le agaga sa fia tulai atu ai ona o se fesoasoani mo le Matagaluega, ae faafetai o lea ua faafofoga mai le Palemia ma le Malo, o le a faapena ona fai ae faafetai.

FOFOGA FETALAI: O lea foi sa fesoasoani atu le Taitai o le Itu Agai leaga o ia sa leoleonana. E le i leoleo a le Malo ae sa leoleonana. O le ala lena na taumafai atu ai e faatau le tulaga o leoleo i totonu o lo tatou atunuu.

E manatu ua leai se isi sui usufono o toe fia saunoa ma o le a tuuina atu le fesili.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, e iloga lava ona sau le uli e toa ai le moa ma e faapena foi ona toa le moa. O le matua manaia o le Lipoti lena ma ou te faamalo atu ai i le Komiti.

O le mataupu lea ou te faatauaina o le Fautuaga Lona 3, e tatau ona faalauiloa suafa o i latou ua tatau ona tala i tua a latou inisiua a o la lava e taatitia ai i totonu o le Kamupani Inisiua. O le taua ia o le itu lea, leaga e taatitia, taatitia, taatitia ai lava ona te i lea ua faatopelau atu e se isi o le Faalapotopotoga. O le mea la lea e taua tele ai le vaai mamao lea e aumai i totonu o le fautuaga lena ma ou te avatu foi le faamalo i le Komiti i le magafagafa.

O le isi itu taua ou te faatauaina, o le itu lea i le taumafai e faatosina tagata. Ia manatua foi, o le Kamupani lena na faatuina ina ua aveese ma i i totonu o Samoa le CML po o le Colonial Mutual Life. O le mea lena na ala ai ona tusia le Tulafono lea i le 1976. Na matua aumai lava le tagata mai fafo e nofo i le Tusitala Hotel ae tusi uma le Tulafono lena i le 1976 ina ia fai ai se tatou lava Kamupani Inisiua ina ia inisiua ai o tatou tagata ma taofi le seleni i

totonu o le atunuu. E le na o le tasi la le Kamupani Inisiua ma o lea na fai ai ma le Pacific Insurance i le tulaga i faalavelave tutupu faafuasei, ona aafia ai lea, o lona la na lua ai kamupani inisiua a lo tatou Malo.

O le faalavelave o lona Kamupani Inisiua mo faalavelave tutupu, e mafai ona e gau ai i taimi uma, ae leai se faalavelave e tupu. Aua na o le totogi atu, totogi atu, totogi atu, a o le insure lea o le soifua, tatou te iloa lelei lava e tupu. O le ala foi lona o lea ua sui ai le igoa ua le taua o le life insurance ae ua tau o le life assurance. O lona uiga o le insure mautinoa, e mautinoa e te oti, e mautinoa e tupu. O le ala lona o lea e eseese ai igoa o le Pacific Insurance ma le Life Assurance i mea ia e lua ona o le tulaga lona mo o tatou tagata. A o le mea lea ua ou vaai i ai i le taimi lenei ua toe tele mai kamupani insure mai fafo. O le fesili la ua mafua aisea ona toe tele mai kamupani inisiua mo le soifua? E tasi lava le tali, e le o lava tulaga i faamanuiaga o lo o tatou avatu. O le ala foi lona e faatauaina ai le fautuaga lona lima, e tataua i le Komiti Faatino o lo o i ai nei ona tilotilo i tului, ina ia lelei tupe e maua a i latou o lo o fai saofaga i le inisiua lenei. O le ala la lea e taua uma ai lava fautuaga nei lau Afioga i le Fofoga Fetalai ma ou te fautuaina e talia.

FOFOGA FETALAI: Malo faafetai. O le a lafo atu i lau Afioga i le Taitaifono pe i ai se isi mea e te fia saunoa ai a o le i tuuina atu le fesili.

Susuga Hon PAPALIITELE NIKO LEE HANG: Faafetai lava i lau Afioga i le Fofoga Fetalai. E leai se isi mataupu ae pau lava le mataupu o le itu lea sa lagalaga mai e le sui usufono mo Faasaleleaga Nu.2, o le tulaga lea i le inisiua o leoleo ma e le o le Lipoti lea e talanoaina ai lea mataupu. Ma lou faaaloalo lava ae faafetai foi i le Afioga i le Palemia ua talia atoatoa Fautuaga ua tuuina atu i la matou Lipoti.

Ma lou faaaloalo lava.

Na faamaonia le Lipoti.

FOFOGA FETALAI: E tusa ai ma le Tulafono Tumau 54, e ao i le Malo ona tuuina mai i le Fono Aoao se tali i Fautuaga na tuuina atu i le Malo mai le Lipoti a le Komiti Filifilia ia le silia le 90 aso talu ona faamaonia e le Fono Aoao le Lipoti.

**P.P.2013/2014 NU.90, LIPOTI A LE KOMITI O GALUEGA,
FELAUAI MA LE SIOSIOMAGA I LE P.P.2012/2013 NU.71,
LIPOTI FAALETAUSAGA A LE PULEGA O UAFU MA TAULAGA A
SAMOA MO LE TAUSAGA FAALETUPE NA FAAIUINA ASO 30
IUNI 2011 – ILOILOGA**

Tofa TUSA MISI TUPUOLA (Taitaifono, Komiti o Galuega, Felauaiga ma le Siosiomaga): Lau Afioga i le Fofoga Fetalai ma le maualuga o le Palemene, ou te tulai atu ma le faaaloalo e faatu le lafo, *Ina ia faautagia e lenei Fono Aoao le Lipoti a le Komiti o lo o tuuina atu ai ana Saililiga, Fautuaga ma Iugafono.*

Faaluaina e le sui usufono mo Faasaleleaga Nu.4, se tasi o sui usufono mo le Au Palota Taitoatasi, Afioga Maualaivao Pat Ah Him ma le sui usufono mo Aiga i le Tai.

Tofa TUSA MISI TUPUOLA: Lau Afioga i le Fofoga Fetalai:

“FAUTUAGA:

I le maea ai o Iloiloga a le Komiti, na faaiugafonoina ai e fautuaina le Malo ina ia:-

1. **Tausisi ma tulai pea le silasila a le Pulega i le faatinoina o ana Matafaioi Autu Faaletulafono, ina ia faaitiitia ma faasaoina ai ana Tupe Faaalu i isi atinae e le fesootai ma lana auaunaga.**
2. **Tatau i le Pulega ona toe iloilo le tau o lisi o ona fanua ma aseta, mo se fesoasoani i ana Tupe Maua.**
3. **Tuuina atu le lagolago a le Malo i le totogiina o le nonogatupe a le Pulega ona o aafiaga o ana Tupe Maua o lo o i ai i le taimi nei.**
4. **Tatau i le Malo ona silasila i se auala talafeagai e faaoga ai le uafu i Satitua mo ni tupe maua, e pei o le lisiina atu i tua i se isi kamupani latou te faagaioiina.**
5. **Fautuaina se siitaga o tupe maua a le Pulega mai tupe totogi o pasese i faigamalaga i vaa i le va o Mulifanua ma Salelologa, mai le .50 o lo o i ai nei i le SAT2.00.**
6. **E pei ona fautuaina e le Komiti i lana Lipoti talu ai, e toe fautuaina le faatauina mai o se masini faaloloto alavaa (palolo) mo le Pulega e fesoasoani ai i ana tupe maua.**

IUGAFONO:

I le maea o iloiloga a le Komiti na faaiugafonoina ai e fautuaina le Fono Aoa,

Ina ia faamaonia le P.P.2012/2013 Nu.71, Lipoti Faaletausaga a le Pulega o Uafu ma Taulaga mo le Tausaga Faaletupe na faaiuina aso 30 Iuni 2011.”

FOFOGA FETALAI: Malo faafetai saunoa i lau Afioga i le Taitaifono o le Komiti. Ua avanoa le tatou Maota mo saunoaga.

Tulai mai le sui usufono mo Faleata Sasae.

Tofa AVEAU TUALA LEPALE NIKO PALAMO: Lau Afioga i le Fofoga Fetalai, e momoli le faafetai i le Afioga i le Taitaifono aemaise foi le mamalu o le Komiti i le Lipoti. Masalo o le isi vaega o le Lipoti o le a le oo i ai sau faamatalaga, aua e pei ua maea ona lisiina le isi vaega lea i le Samoa Shipping, atonu e i ai se taimi ona faasao mai lea e le Afioga i le Taitaifono. Ae i ai nai mataupu ia ou te fia talanoa atu ai i le Afioga i le Taitaifono.

O le mataupu muamua, o le fanua lea i Matagofie. O lea e foliga mai talu lava ona sainia lenei lisi, e leai lava se mea o faia i le fanua lenei, ma o lea foi ua sau i lalo o sailiiliga a le Komiti, o lea ua lata ina maea le taimi o lenei lisi. Ma e lagona ai lava le faanoanoa aua ua leva ona silafia le mea ua oo i ai lenei vaega o fanua. E tasi lenei o fanua e ese le taua ona o lo o tu i totonu o le taulaga, ma e tasi foi lenei fanua o lo o tu i totonu o le taulaga o lo o i ai le matafaga, o le fanua lenei o Matagofie. Ia, a o lea ua leva ona fai lea vaega, a o lea faatoa aumai le fautuaga, a o le fautuaga lea e aumai i i, sei maea le lisi. Atonu o mea faakonekarate i le sainiga o lisi, ae sa tatau ona i ai ni aiaiga o le vaega lenei ina ia mafai ai ona foia faafitauli o vaega faapenei.

O le vaega lona lua lau Afioga, o le fautuaga lea lona tolu a le Komiti. O lo o faapea mai le fautuaga lona tolu, “Tuuina atu le lagolago a le Malo i le totogiina o le nonogatupe a le Pulega ona o aafiaga o ana Tupe Maua o lo o i ai i le taimi nei.” O le mea muamua, e lagona le faanoanoa i le Komiti e leai ma se mea o le sailiiliga a le Komiti i totonu o le Lipoti lenei o sau ai po o a nonogatupe nei lea ua ave i ai le latou lagolago i ai e totogi. A tagai i le isi latou fautuaga lea e faapea mai i le fautuaga mulimuli, e toe faatau se palolo, masalo lea e i le fautuaga ono, “E pei ona fautuaina e le Komiti i lana Lipoti talu ai, e toe fautuaina le faatauina mai o se masini faaloloto alavaa (palolo) mo le Pulega e fesoasoani ai i ana tupe maua.”

O lea e fai mai le fautuaga lona tolu, e ave le aitalafu e totogi e le Malo, a o lea ua toe fautua mai i le fautuaga ono, e o e faatau le palolo. O lau fesili i le Komiti, aisea le mafuaaga ua le iloilo lelei ai le vaega lea o le vaega lea? E fia le tau o le palolo lea e sauniuni i ai? A o lea foi e aumai i luga, o le palolo muamua ua faagoto atu i le sami le vaega muamua, e le o aumaia foi le mafuaaga ua mafua ai ona faapea.

FOFOGA FETALAI: Malie le sui usufono o lo o saunoa sei tuu atu le avanoa i le faamalamalamaga a le Afioga i le Minisita.

Tulai mai lau Afioga i le Minisita mo Galuega, Felauaiga ma Atinae Eseeese.

Afioga Hon Manualesagalala Enokati Posala (Minisita mo Galuega, Felauaiga ma Atinae Eseeese): Lau Afioga i le Fofoga Fetalai, e muamua ona avatu foi faamanuiaga e tusa ai ma le aso soifua o lau Afioga aemaise foi o le Afioga i le Palemia, ua toe o se aga ona aulia lea o le 50 o tausaga, faapena foi le 70 tausaga. Atonu o tausaga taua ia mo le agai i luma, ae faafetai i le Atua o lo o maua pea le soifua.

Ou te iloa o le tasi lenei o Lipoti ma mataupu sa tele ina lagalaga i le taimi ua sola aemaise foi o fautuaga sa tuuina mai. Ma o le silasila a le Malo i le tele o atinae nei, o atinae e tele lona taua, o le faatupulaia ai o galuega e mafai ona galulue ai tagatanuu o le atunuu.

Lona lua, o le auunaga ina ia siitia ai lona tulaga lelei i le faatinoga o auunaga. O le vaavaai lea ma le silasila a le Malo i le tele o atinae nei sa faatino pei o lea e agai i ai le Lipoti lenei. Ia manatua foi lau Afioga, e pei o fetalaiiga a le tatou Alii Faaola, ua o atu foi Peteru ma le ausoo e o e fagogota, ae fai mai, “Tuutuu i le loloto e maua ai ia, e le o le papau a o le loloto.” O le loloto foi lea na faavae ai atinae nei ma fuafuaga nei ina ia faatupulaia le afaigaluega, o ē e mafai ona faatino galuega, e pei foi ona i totonu o le Maota nei, ia maua ni galuega, ia maua ni galuega. E le maua ni galuega pe a leai ni atinae faatino ma fuafuaga ina ia faaleleia ai le auunaga ina ia siitia.

O le tulaga i le palolo lea, ua silia nei ua lata i le 10 tausaga talu ona aumai le palolo lea e faatino ai galuega i Satitua, faatino ai foi galuega i Mulifanua ma Salelologa. O nei masini e faaoga i le sami, e tetele mea, e le faigofie, e tele foi ona aafiaga i ai ma tulaga faaletonu. O le afa lea na uma atu nei 2012, sa faaletonu ai le vaa lea e magoto ai i Mulifanua ona fai lea o le suesuega. O le kamupani lea sa aumai ai le vaa mai fafo i Ausetalia, sa omai fai le latou suesuega ma le latou sailiiliga. O le tau na aumai, ua fai sina taugata tele, e taugata i lo le tau na aumai ai le vaa lea ona o le tulaga ina ia faaleleia le masini lea e mafai ai le dredge lea, le masini lea e mafai ai ona faaloloto o tatou uafu ma tulaga o i ai. Ua ese la le tulaga ua vaavaai i ai le Komiti ma ana fuafuaga ina ia mafai ona ausia. Ou te iloa o se vaega taua, e tatau lava ona i ai se masini lea e mafai ona faaogaina mo le faalolotoina o tatou uafu ma taulaga.

A o le tulaga e pei ona i ai le ... ua tele suiga ua i ai. O le tausaga e 2012 sa fai ai le performance audit, lea sa fai ai le suesuega a le Ofisa Suetusi Sili i le tulaga e faaleleia ai le auunaga ma le faatinoga o galuega i totonu o le Pulega o Uafu ma Taulaga. O le tausaga foi lea sa fai ai le scoping studies e i ai foi le kamupani sa omai fafo sa latou silasila i tulaga ma vaega uma ina ia siitia ai ma faaleleia le auunaga a le Pulega o Uafu ma Taulaga, e le gata i domestics i le feoaiga i le va o Savaii ma Upolu, ae faapena foi i le uafu faava o Malo o lo o i ai i Matautu ma le tatou uafu i Satitua. Ua uma ona faatulaga ia vaega uma ma ua aumai foi fautuaga, o tulaga ia e laasia ai tulaga lelei e tatau ona i ai.

O le vaavaai i tua i Satitua, o lea ua i ai le fetuunaiga lea ua i ai a le tatou Malo o lea ua i lalo o le vaega a le Faalapotopotoga o Vaa. O le taua la o le Faalapotopotoga lea, a outou silasila i ai, o lea foi e aumai ata i Televisi, i le tulaga lelei ua faagasolo lelei ai e le Faalapotopotoga o Vaa le tatou uafu tosovaa lea. E eseese lava i ma Amerika Samoa, aua o Amerika Samoa o le latou tosovaa e fai lava i luga o le sami, a o le tatou dry docking lea e i tua e matua toso lava i luga le vaa i le paumatu ona o le manumanuga ma le vaai ia aua nei aafia lo tatou siosiomaga. O le tulaga lelei lea e i ai. Sa i ai le fesoasoani sa aumai, o le meaalofa, le vaa sa fealua i Samoa ma Toelau, lea na faameaalofa mai ai le vaa lea, lea na ave i luga o le vaa o le tatou vaega tosovaa, o lea ua matua faaleleia ma le atoatoa. O lea foi ua faatino fesoataiga ma Cook Islands, ina ia mafai ona faaoga le tatou vaa lea e lau ai latou uta ma charge ai e latou agai i Pukapuka, le itu i matu o atumotu ia o le Atu Kuki. O le tulaga lelei lena, o la e foi ua i ai le fuafuaga i nisi o vaa o la e ua amata ona faasolo, o la e ua schedule le latou polokalame mo vaafagota po o vessels ia e mafai ona faaoga i ai le tatou vaega lea tosovaa. O tulaga lelei ia.

O le fautuaga sa aumai i le sailiiliga lea, e tatau ona ave i tua i se kamupani latou te faatinoina, ae ua manatu le Malo, ave i le Faalapotopotoga o Vaa, o le isi vaega o vae ma lima o lo o tautuaina le Malo, o i latou ia e sili ona tele vaa ia e faaoga e feoi ai e le gata i Savaii, o le agai i Amerika Samoa, o la e foi e faaoga i le agai i Toelau ma agai ai foi i le Atu Kuki.

E pei o vaega lautetele ia o lea ua faaleleia i tulaga ia i tatou vaa. O lea ou te tilotilo atu i le Lipoti lea na aumai, e pei o tulaga uma lava ia o lea ua ausia. O le matafaioi, leaga o tulaga lava ia sa agai i ai, o mea tosovaa, o le dredge, o femalagaiga i le va o Tutuila ma iinei, leaga o matafaioi tonu lava ia a le Pulega o Uafu ma Taulaga.

O le tulaga foi i tai i le marina, ou te iloa a tatou taamilo i Niu Sila ma Ausetalia, toetiiti lava nai tamai taulaga eseese e i ai lava marina e mafai ona tutu ai vaa. A o se taumafaiga muamua lea o lea ua tatou taumafai i ai, o se marina i i leaga e tele lona aoga. O latou nei e asiasi mai i vaafaila, e moomia le nofoaga lea e mafai ona fesoasoani e maua mai ai le suavai foi lele, ma faigofie ai ona fesootai mai mo le agai i uta. O lona uiga, o se fuafuaga talafeagai ma lelei. O la e talu mai foi le afa, o la e ua faaletonu le isi pier, e lua piers o le pier A ma le pier B. O la e la ua faaletonu le pier B, o lea sa fesootai ma le vaega lea a le Insurance, o lea sa fuafua e omai latou e fai, a o lea ua fesootai mai e faatupe e latou, a o lea ua tau saili e le Pulega o Uafu ma Taulaga se kamupani e mafai ona toe faaleleia ia vaega. A o tulaga uma lava ia e mautu ma lelei ai. A leai se marina faapea i se atunuu, sina tamai lea ua taumafai i ai, o i e amata ai le tatou fuafuaga mo le agai i luma. O lea ua oo mai i le Afioga i le Palemia ma le Malo le studies sa fai mo le fuafuaga lea i Vaiusu. O Vaiusu i le tatou uafu lea e i ai, e ese lava le vaega e i ai cargoes ia vaa ia e omai e aumai uta, ese foi le vaega e i ai cruise ships mo le au tafafao, ese foi le vaega e faapitoa mo tatou vaafaila ia. O le silasila lea a e foi o i ai le tomai faapitoa, e tatau lava ona i ai se vaega faapitoa mo vaafaila ia e asiasi mai, o i foi e faatosina mai ai ma maua ai nai tatou seleni ma fuafuaga o lo o faatino.

E pei o le vaavaai lea i ai i le Lipoti lea ua tuuina mai, o mea uma lava ia o lea ua agai i ai ma faatino. E i ai le fautuaga lona lima lea e faapea e sii i le .50 i le \$2, o le tasi lea fautuaga ou te le taliaina foi. O le ala foi lea o lea ua agai le Malo e tuu Mulifanua ma Salelologa i lalo o se Pulega a le Faalapotopotoga o Vaa, aua a toe sii loa le .50 lea agai i le \$2, o lona uiga e sii foi e le Faalapotopotoga o Vaa pasese mo tagata femalagaai. A o itu lelei ia o lea e vaavaai i ai, o le agaga maua luga ia siitia le auunaga ma ia taumafai ia gafatia e tatou uma aemaise o le mamalu o le atunuu le tulaga o tupe ia e agai i ai e pei o le totogiina o fees ma mea ia pasese femalagaai.

FOFOGA FETALAI: Malie lau Afioga i le Minisita mo Galuega, Felauaiga ma Atinae Eseese o lo o i ai le faauilavea a le sui usufono mamalu mo Aana Alofi Nu.3. Tulai mai le sui usufono mo Aana Alofi Nu.3.

Afioga TOEOLESULUSULU CEDRIC POSE SALESA SCHUSTER: Faafetai lau Afioga i le Fofoga Fetalai mo le avanoa. E leai o se fesili fia malamalama ona o lea e maitau atu ua tali le Afioga i le Minisita e tusa ai o suesuega a le Komiti, ae pei o lea e pei ona e saunoa i le taimi ua tuanai, e tuu le 90 aso e tali mai ai le Malo. O le avanoa lenei i lou talitonuga lau Afioga i le Fofoga Fetalai e faaali ai manatu o le Maota Fono nei ona tali lea o le Taitaifono ma le Komiti e uiga i le Lipoti, ae le o se taimi e tali ai le Afioga i le Minisita. Faafetai.

O le fesili lea e fia malamalama ai lau Afioga.

FOFOGA FETALAI: E leai o lea ua ou maua le finagalo o le sui usufono mo Aana Alofi Nu.3, e le mafai lava, e avanoa lava le Malo e tali i so o se taimi. A manao foi le Palemia po o le Minisita e tali i tulaga o felafolafoaiga, e avanoa e tali. Ae pei ona ou taumafai atu...

Ia sei tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neiote Sailele Malielegaoi: Lau Afioga i le Fofoga Fetalai, e pei o le tulaga lena ua tele le fia lauga i lenei Lipoti a o lea ua ta le 1:00, ae ese le manaia o le fautuaga lea, sii i luga le .50 i le \$2.00 le pasese ae tuuai i le sui usufono mo Gagaemauga Nu.2 ma le sui usufono mo Aleipata Itupa i Luga, o laua ia e ana le fautuaga, aua ou te iloa e avatu loa lava, o le supoga lena o le Komiti e le toatele o le a femalagaai, a o mea faapea, o le tele ia o le tetee. E le iloa pe sii atu loa solomua lava i le Itu lena ona tetee. Ae taoto ai faapea, e tele lava manatu e fia fai i le manaia o lenei Lipoti, ae leaga o lea ua ta le 1:00.

ISI FAASILASILAGA A LE FOFOGA FETALAI

FOFOGA FETALAI: Ia, e pei o le ala lea e faamalulu atu ai i le tatou Maota i lenei vaega o le aso, malie foi lau Afioga i le Taitaifono ona o lea ua tatou taunuu tonu i le tatou taimi malolo, o le a faaauau felafolafoaiga i le mataupu lenei ma tuu atu foi le avanoa e tali mai ai le Minisita pe a i ai se isi mea faaopoopo i lana folasaga manino ma tali mai foi le Afioga i le Taitaifono o le Komiti e a ia le Lipoti.

Faafetai atu i le paia ma le mamalu o le Maota i lenei vaega o le aso. E manatu ua tatou laasia le tele ma le anoanoai o tuleiga ma saunoaga ma felafolafoaiga o lenei aso. E talitonu o lo o tatou alu lava i le pao a le tofa ma le faautautaga loloto, e le o faatopelaua, ae o lo o faapena ona vailiili manino ma talatala malie le auafamau i le Maota i lenei aso. O lo o taua foi tuleiga ma saunoaga e ala i fautuaga i Lipoti na tuuina mai e Komiti, ae o lo o faapena foi ona talitalimalu le Malo ma avatu le fautuaga i tulaga sagatonu ina ia manino ma malamalama le tatou Maota aemaise o le faafogafoga mai a le atunuu. E momoli atu ai le agaga faafetai tele i lenei aso ma le tulaga o le tatou Fonotaga, malo le onosai, faafetai le faapalepale, malo le usufono i le paia ma le mamalu maualuga o le tatou Maota.

Ae fia faasilasila atu o loo i ai pea le tatou polokalame faale-aoaoga ua uma ona faatulagaina. O lenei polokalame ua faatulagaina mai le amataga o lenei tausaga, ua le mafai ona toe fesuiaia ona o le fetuunaiga o le tatou Fono na i ai, o lea na i ai le faamoemoe o le a faataunuu pea ona o tagata o lo o omai pea i le tatou polokalame o le Samoa Parliamentary Strengthening Programme ua le mafai ona toe fetuunai ona o le taimi taua mo latou. Ae talitonu o lo o taotoga lelei ma le tulaga o lo o faapolokalame ai e le Afioga i le Palemia ma au nei le tatou Fonotaga. O lo o i ai le tatou polokalame o lo o faagasolo i le aoauli nei mai le itula e 2:00 seia ta le itula e 5:00 ona tatou malolo ai lea. Ua manatu e tatau ona tatou malolo lelei, aua tatou te Fonopo leaga o lea e fai le tatou semina. O le a tatou mataitu i le aso a taeao pe a lava lo tatou malosia ona faapena lea ona toe fetuunai le tatou Fono mo se tatou Fonopo. A leai foi, ia faatoa tatou Fonopo i le Aso Lulu ma tatou faamaea atu ai lava ma faagasolo ai nisi o fuafuaga o lo o faataatitia.

O lo o saunia pea le tulaga o le tatou faamalositino masani, o lo o tapena e le tatou aufaigaluega le tulaga o le tatou faamalositino i lenei aso, ma nisi o faaaloaloga faaauau aua le aso soifua o le Afioga i le Palemia ma le Fofoga Fetalai. E talosaga atu e tou te afifio atu mo le tatou semina faapitoa lenei, ua saunia foi le tatou Komiti mo nai alauni laiti mo lo outou paia, aemaise le

faamalositino e ala i vaitaumafa ma le taumafataga e faatino ai lenei faamoemoe i lenei aso.

Ma e i ai le talitonuga e taitai lo outou soifua aua le aso fou a taeao, aemaise o le faaauuina o le tatou galuega. E faafetai atu Samoa i lau tapuaiga i lenei aso, e talitonu ua tau i manu ma ae manuia faiva o lou Palemene, talu lava le tui mai o le mulipapaga ma feula mai le mulila i le paia o Aiga ma latou Tama, Tama ma Aiga aemaise Samoa aoao i ona tulaga faalupelupe.

A o lei faaiuina le tatou Fonotaga i lenei aso, ou te tatalo atu i le sui usufono mamalu mo Samoa Aoao, Afioga Maualaivao Pat Ah Him, tulai maia e fai se tatalo e faamanuia ai le tatou taumafataga, le lunch ma faamanuia ai le tatou semina o le a tatou alo atu i ai ma le faamanuiaga mo le po a nanei ona tolopo aloaia ai lea o le tatou Fono Aoao.

Na motusia Felafolafoaiga ina ua tolopo Taulumaga a le Fono Aoao i le itula e 1:05 i le aoauli.